

Tuhbi dxihtsi nin bia'han loh ra' bwiinn Hebreu ra'

Dxiohs guñi' pur Llii'n Ñi'h

1 La'n dxyih galohpii'y i ra'
ziahán guhca dxyi'dxyi nin
guñi' Dxiohs loh ra' xtitaliudo'
ra' nu'h, nee ziahán za guñi' Ñi'h
pur guehtu daada ra' nin baca'h
xchi'dxyi Ñi'h,² per nnah la'n
dxyih ra' rii' guñi' Dxiohs loh nu'h
pur Llii'n Ñi'h nee basia'hannee
Ñi'h garaatii' nin nuu guidxyiyuh
la'h Llii'n Ñi'h laasii pur Llii'n
Ñi'h bwi'hnncha'y i Ñi'h garaatii'.
³ Ni'chin Llii'n Dxiohs naa la'gahca
lla'ñih nin naa Dxiohs nee naa
pa'hcaa Ñi'h ziga gahca naa Xtaada
Dxiohs Ñi'h, nee cun xquelrnabwa'
Ñi'h naa dzi'tsi garaa ni'chi si
gurihxchih, ya chin guyal'loh basiaa
Ñi'h la'h nu'h loh duhlda, guzohba
Ñi'h xlahdu derehchu Xtaada Ñi'h.

Lasahca ru Llii'n Dxiohs loh ra' xaanjla Ñi'h

⁴ Bwi'hnn lasahca ru Dxiohs la'h
Llii'n Ñi'h loh ra' aanjla ra', laasii
Llii'n gahca Ñi'h dzi'baloh loh ra'
aanjla pur ziroot' ru guelrnabwa'
nin nahpa Ñi'h nnah cun neezaa
dzi'n nin nahpa Ñi'h,⁵ laasii la'h
Dxiohs nin tuhbi dxyih ayi guñi'

Ñi'h loh nin tuhbi xaanjla Ñi'h
ñahbi Ñi'h:

Yi'h naa lu'h Llii'nahn;
nnadxyih guliin yi'h tin
guinabwa' lu'h.

Nin ayi za guñi' Ñi'h loh tuhbi
xaanjla Ñi'h:

Na'h gaca'hn Xtaada lu'h, nee
yi'h gaca lu'h Llii'nahn.

⁶ Per dxyih nin guxe'hlá Ñi'h
Llii'n galoh Ñi'h loh guidxyiyuh
rahbi Ñi'h:

Garaa ra' xaanjla'hn
gulgazu'nllihbi nez loh
Llii'nahn.

⁷ Ya chin baze'ta Dxiohs xaanjla
ra' Ñi'h rahbi Ñi'h:

Ruhnn Ñi'h xaanjla Ñi'h ziga
bwi'h, ya xmooza Ñi'h ruhnn
Ñi'h ziga bwehla.

⁸ Per chin baze'ta Ñi'h Llii'n Ñi'h
rahbi Ñi'h:

Yi'h naa lu'h Dxiohs, nee
ayi chuu dxyih cha'löh
xquelrnabwa' lu'h,
nee zinabwa' xnehzza za lu'h.

⁹ Ruca'h sto' lu'h guunn lu'h dzi'n
za'ca ya rdxyi'chi lu'h gallee
nin naa dxaaba ra',
ni'chin la'h Dxiohs, Xchiohs lu'h,
basiahxi ru Ñi'h la'n lasto'

lu'h mahzi ru que la'h ra'
lasaa' ra' lu'h.

¹⁰Rñi' za Ñi'h squii':

Yi'h Daada, chin guzo'balohyi
bwi'hnncha'y i lu'h garaatii'
ra', bwi'hnncha'y i lu'h
guidxyiyuh,
yi'h gahca za bwi'hnncha'y i lu'h
dxibaa'.

¹¹La'h ra'n ziñichiloh ra'n per yi'h
ba nuu nabahan lu'h para
tu'pazi,

ya garaa ra' nin nuu guidxyiyuh
ziuhlla ra'n ziga riuhlla
lahdxi;

¹²zutu'b i ra' lu'hn ziga rdu'b i
tuhbi lahdx i per yi'h ayi
guidxa'h ziga naa lu'h ya
xihza ra' lu'h ayi chuutii'
dxyih nin gazaal' ra'n.

¹³Nee ¿cuucalla rahbi Dxiohs loh
tuhbi xaanjla Ñi'h squii?>:

Guzohba xlahdu derehchu'hn
tin guinabwa' lu'h hasta
guiga'ha loh dxyih yi nin
gutsiiga ra'n bwiinn ra' nin
rdxyi'chinee yi'h loh lu'h,

¹⁴laasii la'h ra' aanjla ra', spíritu
si naa ra' ba loh xtsi'n Dxiohs tin
zi'chi gacanee ra' ba la'h ra' bwiinn
nin guica'ha guel nabahan nin ayi
ñichilohtii'.

**Ayi chyu gusaa'n dxyi'dxyi nin
guta'h la'h nu'h loh duhlda**

2 Ni'chin nnah chuu nu'h cha'zi
nu'h xchi'dxyi Dxiohs nin ba
bihn dxiahga nu'h, tin ayi nnagah
gachiria'caa nu'h loh xneziuh
Dxiohs, ²laasii la'h tu ba naann
tu nahpa guzohba dxyi'dxyi nin
guñi' ra' xaanjla Dxiohs la'n dxyih
galoh ra', ya bwiinn ra' nin guyuu'

xtuhlda ñi'h pur ayi bazo'badxiahga
ra' ba dxyi'dxyi chi bat i'dxi Dxiohs
la'h ra' ba loh guelrza'cazzii duxa.

³Yannah, ¿xa gaca ta'h nu'h loh
xquel rza'cazzii Dxiohs sidela la'h
nu'h gasaa'n nu'h dxyi'dxyi nin
lasahca ru nin guta'h la'h nu'h loh
duhlda? Laasii la'h gahca Daada
Jesucristu basia'hannee dxyi'dxyi
chi la'h ra' xpwiinn Ñi'h, chi'chiyi
baluu'y i ra' ba dxyi'dxyi chi la'h
nu'h, ⁴pwihs i Dxiohs baluu'y i la'h
nu'h guchii pa'ca dxyi'dxyi ra' chi
laasii bwi'hnn Ñi'h sehn ra' neezaa
ziahán dzi'n roo ra' nin badxyigaa'
duxa loh ra' bwiinn ra', neezaa
ziahán ra' dzi'n za'ca bwi'hnn Ñi'h,
ya badi'hi za Ñi'h Spíritu Saantu
xteenn Ñi'h la'h ra' nin gwachiisto'
xchi'dxyi Ñi'h tin guunn ra'
tuhbigah ra' nu'h guriin-guriin
dzi'n nin xclaa'dzi Dxiohs guidi'hnn
nu'h.

**Jesucristu naa nin guta'h
la'h nu'h loh duhlda**

⁵Dxiohs ayi badi'hi Ñi'h
guelrnabwa' la'h ra' xaanjla Ñi'h
ziga ñinabwa' ra' ba loh guidxyiyuh
cuubi nin dxiugaze'ta nu'h nnah.
⁶Guyuu' tuhbi bwiinn nin bac'a'h
xchi'dxyi Dxiohs loh dxihtsi hasta
rñi' squii':

¿Chyu naa tuhbi ndxi'hw, tin
dxiagannasto' lu'h la'h ba?

O ¿chyu naa bwiinn guidxyiyuh
tin guza'sto' lu'h la'h ra' ba?

⁷Nagaaba dxyih si gullia'a'y i'h
bwi'hnn lasahca ra' lu'h ba
loh aanjla ra',
chi'chi babia'garrii badi'hi lu'h
guel rnabwa' cun guel lasahca
la'h ra' ba tin guinabwa'

ra' ba loh garaatii' ra' nin
bwi'hnncha'y i lu'h.

⁸ Badi'hi lu'h guelrnabwa' la'h
ra' ba tin guinabwa' ra'
ba garaatii' nin nuu loh
guidxyiyuh.

Nee guchii basia'hannee Dxiohs
garaatii' nin nuu loh guidxyiyuh
la'h ra' bwiinn tin guinabwa' ra'
ban, per rachidia'ha nu'h gue'du
guinabwa' ra' bwiinn garaatii'
nicala ba badzii'ba Dxiohsan loh
naa ra' ba, ⁹ per rachidia'ha nu'h
loh Jesucristu, nin bwi'hnn Dxiohs
gulliaa' ru guhca lasahca Ñi'h loh
ra' xaanjla Dxiohs chin guyuu'
Ñi'h loh guidxyiyuh paaldaa si
dxyih. Chin batuhlla Jesucristu
xtsi'n Ñi'h loh guidxyiyuh, badi'hi
za Dxiohs lla'ñih la'h Ñi'h cun
bwi'hnn lasahca Dxiohs lah Ñi'h,
ya pur ruca'hsto' Dxiohs la'h nu'h
ni'chin basaa'n Ñi'h batidxiloh
Llii'n Ñi'h guelrza'cazzi duxa nee
guhchi Ñi'h pur la'h nu'h. ¹⁰ Dxiohs
bwi'hnncha'y i garaatii' ra' nin nuu
loh guidxyiyuh cun rnabwa' za Ñi'h
garaatii', ya la'h Dxiohs xclaa'dzi
Ñi'h chenee Ñi'h ziahan llii'n Ñi'h
llaa'ndxibaa', ni'chin guxe'hla Ñi'h
Llii'n pa'caa Ñi'h tin billi'hi llarihn
Ñi'h nin guta'h la'h ra' bwiinn
loh duhlda chin batidxiloh Ñi'h
guelrza'cazzi loh cruhzi, ¹¹ laasii
Jesucristu nin ruhnn rbahan
bwiinn loh guelnabahan nayaa,
neezaa bwiinn ra' chi tuhs i Dxiohs
naa Xtaada ra' ba; ni'chin nin ayi
ratuhyi loh Llii'n Dxiohs rñi' Ñi'h
loh ra' ba ziga bwihtsi Ñi'h la'h ra'
ba. ¹² Ziga caa loh Xchihtsi Dxiohs
squii' guñi' Dxiohs:

Zulu'y i hn la'h bwihtsi ra'n xa
naa lu'h,
nee zuhnn lasahca zahn lah
lu'h loh ra' ba nee zu'l'dazahn
himnu ra' nez hasta gadiaa'ha
ra' ba.

¹³ Rahbi za Ñi'h:

Zibwe'za'hn gacanee Dxiohs
na'h.

Nee stuhbi lahta rahbi Ñi'h squii':
La'n zu'h rii' cun garaa ra'
llii'nahn nin bani'hi Dxiohs
na'h.

¹⁴ Tuhbi famihyi naa ra' ba
tuhs i bwe'hla, nee nuu za ra' ba
tuhs i rih; ni'chin chin badzih
Jesucristu loh guidxyiyuh gucah
Ñi'h bwe'hla nee guyuu' za
Ñi'h rih per ya loh nin guhchi
Ñi'h bazia'tii Ñi'h xquelrnabwa'
bwiinndxaaa nin guxaala xneziu
guelguhchi loh guidxyiyuh, ¹⁵ ya
zi'chi bwi'hnn Ñi'h tin ayi ru
guidxyihbi nu'h guelguhchi, laasii
nuu ra' bwiinn nin rdxyihbi
dux a gachi, rluu'yi ba guna'zu
guelguhchi la'h ra' ba gaduhbi
loh xquelnabahan ra' ba, ¹⁶ pwihs i
ayi bi' Ñi'h para ñahcanee Ñi'h
la'h ra' aanjla ra' sino que bi' Ñi'h
tin gacanee Ñi'h la'h ra' llahga
guehtu Abrah, ¹⁷ ni'chi nin naa
Ñi'h tuhbi bixohza xteenn Dxiohs
nin ralahsa sto' Ñi'h, tuhbi bixohza
za'ca nin xclaa'dzi Dxiohs gaca
Ñi'h tin guta'h Ñi'h la'h ra' bwiinn
loh duhlda, ¹⁸ laasii la'h gahca Ñi'h
batidxiloh Ñi'h guelrza'cazzi nee
gudxi'hyi za bwiinndxaaa xa ñuu'
xtuhlda Ñi'h, ni'chin nnah zahca
gacanee Ñi'h la'h ra' bwiinn nin
ze'za'bi loh duhlda.

**Lasahca ru Jesuhs loh
guehtu Moisehs**

3 Pwihs i bwihtsi ra'n laasii naa tu bwiinn ra' nin gudihdxyi Dxiohs tin gaca tu llii'n Ñi'h; gulgaza'sto' tu la'h Jesucristu nin guxe'hla Dxiohs loh ra' nu'h nee nin naa za bixohza nin lasahca ru nee nin riachiisto' ra' nu'h xchi'dxyi Ñi'h. **2** Xnehza baza'loh Ñi'h bwi'hnn Ñi'h garaa nin guxe'hla Dxiohs la'h Ñi'h guunn Ñi'h loh guidxyiyuh ziga gahca bwi'hnn guehtu Moisehs chi'chi laasii xnehza za bwi'hnn ba nee gohpa za'ca ba la'h ra' xpwiinn Dxiohs. **3** Pwihs i lasahca ru Jesucristu loh guehtu Moisehs ziga naa Ñi'h ziga tuhbi bwiinn nin ruza' tuhbi yuu', lasahca ru ba loh yuu' nin bwi'hnncha'y i ba, **4** pwihs i cuunchi'hzi yuu' nuu xballwaa'nan per Dxiohs gulahchixchih garaatii' cohsa nin nuu loh guidxyiyuh, **5** pwihs i bazo'badxiahga guehtu Moisehs xchi'dxyi Dxiohs ziga tuhbi bwiinn nin biga'b i nin cayahpa la'h ra' snuhn xpwiinn Dxiohs nin naa ra' ziga yi hdzi Ñi'h nee guñi'xgah ba cuun ra' dzi'n nin gue'du guunn Dxiohs, nee nnah la'Ñi'h bwi'hnn baza'loh Ñi'h dzi'n ra' chi, **6** per la'h Jesucristu bazo'badxiahga Ñi'h dxyi'dxyi laasii Llii'n pa'caa Dxiohs naa Ñi'h, ni'chin naa Ñi'h bixohza za'ca loh ra' bwiinn nin naa ziga yi hdzi Dxiohs, nee la'h nu'h naa nu'h xpwiinn Bixohza rii' sidela chozahnee dzi'tsi nu'h ziga ruluu'yi xchi'dxyi Ñi'h nee sidela za dxiahxi nu'h loh siguhra nin nahpa nu'h dxie'gall'i'h Ñi'h la'h ra' nu'h dxyi'h nin guibia'garii Ñi'h.

**Guelrzi'laa'dzi xteenn
ra' xpwiinn Dxiohs**

7 Ni'chin zigapa' rñi' Spíritu Saantu xteenn Dxiohs squii': Sidela la'h tu ruca'dxiahga tu dxyi'dxyi nin rñi' Dxiohs loh tu nnah, **8** ayi guunn nahda sto' tu ziga bwi'hnn ra' paaldaa ra' xtaada guldoo' tu chin guca'nzaa ra' ba nez loh dahah desiertu ra' nee guluu'llahn ra' ba sto'n, **9** hasta bidxyi'chineen ra' xtaada guldoo' ra' tu Na'h laasii mnasto' ra' ba ayi Na'h dxi'h zeene'hra'n ba nicala bwa'ha ra' za ba cuun dzi'n roo ra' nin bwi'hnnna'h n loh ra' ba loh chwa'ha yihza. **10** Pwihs i ni'chin nin bidxyi'chinen la'h ra' bwiinn ra' chi, nee bwi'hnnna'h n lligaaba la'n lasto'n: Zuu bia'hannee ra' ba lligaaba dxaaba nin nuu la'n lasto' ra' ba, nee ayi nnaa ra' ba dxiu'nbwa' ra' ba xnezyuun. **11** Pwihs i ni'chin nin guñi' chihpa Dxiohs loh nin rdxyi'chinen Ñi'h la'h ra' ba rahbi Ñi'h: Ayi chuu dxyi'h chu'tii ra' ba loh xquelrzi'laa'dzihnn. **12** Bwiitsi ra'n, gulgahca nasiin tin nin tuhbi tu ayi chuu lligaaba dxaaba sto' tu tin ayi guiria'caa tu loh Dxiohs nin nuu nabahan dzi'tsi pur nin ayi chechiisto' tu la'h Ñi'h, **13** ni'chin nnah gulcu'gui'w sto' lasaa' tu guillii-guillii ziga tuhbi ziga stuhbi tu

gaduhbi nin gaca guunn tun, tin zi'chi nin tuhbi tu ayi gaca nahda sto' tu pur guelrusagui'hi xteenn duhlda,¹⁴laasii sidela la'h nu'h chozah dzi'tsi nu'h loh xchi'dxyi Dxiohs nin gwachiisto' nu'h chin bachidxiu'nbwa' nu'hn, chi'chi ziuu' nin guidxiaapa nu'h loh Jesucristu.
15 Ziga caa loh Xchihtsi Dxiohsa:

Nnadxyih, sidela la'h tu rihn tu
 nin rñi' Dxiohs,
 ayi gaca tu bwiinn sto' radxipa
 ra' ziga guhca ra' bwiinn ra'
 nin bidxyi'chinee la'h Ñi'h.

16 ¿Chyu ni'ca guhca ra' bwiinn
 ra' nin bidxyi'chinee Dxiohs chin
 bihn dxiahga ra' ba xchi'dxyi Ñi'h?
 Pwihsu casi garaa ra' bwiinn ra' nin
 babwe'he Moisehs loh guihdxyi
 Egiptu,¹⁷nee ¿chyu bwiinn ra'
 bidxyi'chinee Dxiohs loh chywa'ha
 yihza? Pwihsu la'h ra' bwiinn ra'
 nin biaaba loh duhlda nee guhchi
 za ra' ba loh dahan desiertu.
18 Nee ¿chyluloo ra' rahbi Ñi'h loh
 dxyi'dxyi rii?:

Ayi chuu ra' pa'caa ba loh
 xquelruzi'laa'dzihn.

Pwihsu loh ra' bwiinn ra' nin
 ayi bazo'badxiahga xchi'dxyi
 Ñi'h,¹⁹yannah rachidia'ha nu'h
 ayi guhca ñu'tii ra' ba laasii ayi
 gwachiisto' ra' ba xchi'dxyi Ñi'h.

4 Ni'chin sidela bia'han
 dxyi'dxyi Ñi'h ziuu'pa'caa
 nu'h loh guelruzi'laa'dzxi xteenn
 Ñi'h, nahpa guidxiaapa nu'h
 la'gahca nu'h tin ayi chyu tuhbi
 nu'h ayi guunn gahn chu'tii loh
 guelruzi'laa'dzxi chi,²laasii neezaa
 ra' nu'h la'h nu'h bihn dxyi'dxyi
 nin rusiaa la'h bwiinn loh duhlda,
 ziga bihn ra' za bwiinn ra' chin;

per para la'h ra' bwiinn chi ayi xi
 ballu'yitii' dxyi'dxyi ra' chi nicala
 bihn ra' ban.³ Per la'h ra' nu'h ziga
 gwachiisto' nu'h, naa nu'h bwiinn
 ra' nin chu'tii' loh guelruzi'laa'dzxi
 chi nin baze'ta Dxiohs chin guñi'
 Ñi'h squii':

Loh xquelnadxyi'chihin guñi'
 chihpa'hn ayi chutii' ra' ba
 loh xquelruzi'laa'dzihin.

Nicala la'Ñi'h batuhlla la xtsi'n
 Ñi'h chin gurihxchih guidxyiyuh.
4 Pwihsu loh stuhbi lahta loh
 Xchihtsi Dxiohs rñi' squii' pur dxyiy
 nin ruzi'laa'dzxi bwiinn:

Xo'pa dxyiy bwi'hnn Dxiohs
 xtsi'n Ñi'h ya gubiwdxii
 gaadzii bazi'laa'dzxi Ñi'h.

5 Ya stuhbi lahta caa loh Xchihtsi
 Dxiohs nin guñi' Ñi'h squii':

Ayi chutii' ra' ba loh
 guelruzi'laa'dzxi xte'nnahn.

6 Per ria'dxyi ru chu'tii ru ziahan
 ru bwiinn ra' loh guelruzi'laa'dzxi
 chi ya bwiinn ra' nin mweer bihn
 ra' dxyi'dxyi ra' nin rusiaa la'h
 bwiinn loh duhlda, ayi chutii' ra'
 ba laasii ayi bazo'badxiahga ra' ba
 dxyi'dxyi ra' chi,⁷pwihsu ni'chin
 nin baca'hbwa' Dxiohs tuhbi dxyiy
 nin gaca "Nadxyih", laasii chin
 gudii'dxi ziahan yihza guñi' la'ga'h
 Ñi'h pur la'h guehtu Davihd chin
 basañi' Ñi'h la'h guehtu Davihd
 dxyi'dxyi rii':

Nnah sidela la'h tu rihn tu nin
 rñi' Dxiohs loh tu,
 ayi gaca tu bwiinn sto' radxiipa.

8 Sidela la'h guehtu Josueh
 ñudi'hi guelruzi'laa'dzxi chi la'h
 ra' bwiinn Israel ra', Dxiohs ayi
 ru ñiñi' Ñi'h pur stuhbi dxyiyhi.
9 Pwihsu nnah ria'han ru tuhbi

guelruzi'laa'dzi para la'h ra' xpwiinn Dxiohs, ¹⁰laasii bwiinn ra' nin riu'tii loh xquelruzi'laa'dzi Dxiohs, ruzi'laa'dzi ba loh xtsi'n ba ziga za bazi'laa'dzi Dxiohs loh xtsi'n Ñi'h, ¹¹pwihs i ni'chin nin nahpa chozah nu'h gazo'badxiahga nu'h dxyi'dxyi tin gachidxu'tii nu'h loh guelruzi'laa'dzi chi, tin ayi chuu tuhbi nu'h nin gaca dxiipa sto' nu'h, ziga guhca dxiipa sto' ra' bwiinn ra' nin ayi gwachiisto' ra' Ñi'h, ¹²laasii xchi'dxyi Dxiohs nuu nabahan nee nahpan guelrnabwa!. Naan ziga tuhbi spahda nin caa duxa garoopa dihtsi Ñi'h, nee ria'zin hasta nuu xalma bwiinn cun spíritu ba, nee ruluu'yin cuun lligaaba nin nuu lasto' bwiinn cun neezaa dзи'n nin xclaa'dzi ba guunn ba. ¹³Ayi nin tuhbi xiilla nin bwi'hnncha'yı Dxiohs chuula'nan loh Ñi'h; garaa ra'n rluu'yiloh ra'n loh nayaa loh Dxiohs, nin nahpa gachidxixtee nu'h loh Ñi'h.

Jesucristu naa bixohza nin lasahca duxa

¹⁴Jesucristu Llii'n Dxiohs naa xpixohza nu'h nin lasahca duxa, laasii la'h Ñi'h naa Ñi'h nin ba biuu'lлаа'ndxibaa', ni'chin nin nahpa chozah dзи'tsi nu'h loh xchi'dxyi Ñi'h, ¹⁵laasii la'h xpixohza lasahca duxa nu'h chi zalahsasto' Ñi'h la'h nu'h pur nin rachidi'hnn nalaasa loh nu'h tin ayi dxiaaba nu'h loh duhlda, laasii la'h Ñi'h zi'chi gahca za batı'dxiloh Ñi'h guelrza'cازii per ayi guyuu' xtuhlda Ñi'h. ¹⁶Ñi'chin ayi chyu guidxyihbi gachibwihdxyi-gachinaaba nu'h loh Xchiohs nu'h nin nadzii'hi la'h

nu'h tin galahsasto' Ñi'h la'h nu'h nee gacanee Ñi'h la'h nu'h chin guichi'hn nu'h Ñi'h.

5 Galohyi garaa ra' bixohza nin lasahca ru loh ra' bixohza rbwi'hi ra' ba loh ra' ndxi'hw. Bixohza lasahca ra' chi rnaaba loh Dxiohs pur bwiinn, nee la'h za ba rni'ba pur guhn cun guidxa'h nin rbahchi guhn bwiinn loh Dxiohs tin zi'chi rie'w loh xtuhlda ra' ba loh Dxiohs, ²ya pur nin naa bixohza bwiinn guidxyiyuh nee zahca chuu xtuhlda ba, ni'chi zahca galahsa sto' ba la'h ra' bwiinn nin ayi rihn dxyi'dxyi ra' cun bwiinn ra' nin muuza'bi loh duhlda, ³ya pur nin riuu' xtuhlda ba pur la'h gahca ba, ni'chin nahpa gudi'hi ba guidxa'h loh Dxiohs tin zi'chi dxie'w loh xtuhlda ba ziga rie'w za loh xtuhlda ra' bwiinn guihdxyi. ⁴Nin tuhbi bwiinn ayi nuu guunn lasahca ba la'h gahca ba gaca ba bixohza laasii Dxiohs naa nin rbwihdxyi la'h nin rahca bixohza tin rudi'hi Ñi'h rahca ba bixohza ziga badi'hi Ñi'h guhca guehtu Arohn bixohza, ⁵ya zi'chi za la'h Jesucristu, ayi la'h dxi'h Ñi'h gulii Ñi'h la'h gahca Ñi'h naa Ñi'h bixohza nin lasahca ru, laasii Dxiohs gule'helah la'h Ñi'h gaca Ñi'h bixohza nin lasahca ru, ziga rahbi Dxiohs:

Yi'h naa lu'h Llii'nahn, nnadxyih
guliin yi'h tin guinabwa' lu'h.

6 Squii' caa stuhbi lahta loh
Xchihtsi Dxiohs:

Yi'h naa lu'h tuhbi bixohza para
tu'pazi ziga guhca guehtu
Melquisedec.

7 Chin gubahan Jesucristu
loh guidxyiyuh rii' gudihdxyi-

gunaaba Ñi'h loh Dxiohs, cun guñi' Ñi'h jwersi roo' cun dxigah bie'w ñihsabwii loh Ñi'h nezloh Dxiohs, nin nahpa guelrnabwa' roo' ñuta'h la'h Jesucristu loh guelguhchi; nee bwi'hnn cweenta Dxiohs xchi'dxyi Jesucristu laasii bazo'badxiahga Ñi'h xchi'dxyi Dxiohs. ⁸Ni'chin Jesucristu nicala naa Ñi'h Llii'n Dxiohs basi'dxi Ñi'h bazo'badxiahga Ñi'h dxyi'dxyi ziga nahpa batidxiloh Ñi'h guelrza'cazii, ⁹ya chin badzihm dxyih batuu'lla Ñi'h garaa ra' dzi'n nin rclaa'dzi Dxiohs guunn Ñi'h, biga'ha Ñi'h naa Ñi'h nin gusiaa la'h bwiinn loh duhlda ziga garaa ra' bwiinn nin guzo'badxiahga xchi'dxyi Ñi'h, ¹⁰laasii Dxiohs bazo'ba lah Ñi'h bixohza nin lasahca ru, naa Ñi'h bixohza ziga guhca Melquisedec bixohza.

**Nagahn duxa guibia'garii
chechiisto' bwiinn ra' nin
rusaa'n xchi'dxyi Dxiohs**

¹¹Rclaa'dzi nu gachiñi' nu ziahan ru dxyi'dxyi pur Jesucristu, nin lu'h nagahn duxa para baluu'y i nu la'h tu, laasii nihin ria'zi dxyi'dxyi yihca tu, ni'chin nin ayi gacabwa' tun. ¹²La'h tu cadxyih roo' gwachiisto' tu xchi'dxyi Jesucristu ñahca tu nin ñuluu'y i dxyi'dxyi chi la'h stuhbi bwiinn, per la'laha'hi rchi'hn chyu guluu'y i la'h tu stuhbi dxyi'dxyi ra' nin mahzi ayi guinagahntii' ra' xteenn Dxiohs, nee nnah biahca tu ziga bweezu ra' nin ree' duuda ayi naa tu ziga tuhbi nin rahw guehta nin ba biaa loh xquelrihn ñi'h, ¹³ya nin ree' ra' duuda chi naa ra' ziga

zi tuhbi biñi'n bweezu'hn nin ree' duuda ni'chi ra' ayi riu'nbwa' za'ca xchi'dxyi Dxiohs. ¹⁴Ya nin rahw guehta naa ra' ziga bwiinn ra' nin baniin ca zuu, nin ba naann cuun nin naa dzi'n za'ca nee cuun za nin naa dzi'n dxaaba, laasii ba biaa loh xigaaba ra' ba.

6 Yannah chozah gaze'ta ru nu'h xchi'dxyi Dxiohs tin chuu ru xquelrihn nu'h, ni'chin nnah chozahru nu'h loh garaa dxyi'dxyi nin basi'dxi nu la'h tu chin gue'du gwachiisto' tu la'h Jesucristu dez dxyih nin bachiza'loh nu'h; ba basi'dxi nu'h nahpa chechiisto' nu'h xchi'dxyi Dxiohs, ²ba basi'dxi za nu'h guelrohbañihsa, cun ba basi'dxi za nu'h xa rudzii'ba naa ra' bwiinn guhla ra' yihca ra' bwiinn tin guunntaa'y i ra' ba la'h ra' ba, nee ba naann nu'h ziuu' dxyih gabahan ra' bwiinn guuchi, cun ba naann za nu'h guunn Dxiohs guelguxchisi nin naa par tu'pazi. ³Pwihsí chozah nu'h gasi'dxi ru nu'h sidela la'h Dxiohs nnaa Ñi'h, ⁴pwihsí guyuu' bwiinn ra' nin bia'ñih loh xquelrihn ñi'h, nin guca'ha guelnaza'ca nin rudi'hi Dxiohs, nin guleezaa Spíritu Saantu xteenn Dxiohs la'n lasto' ra' ñi'h. ⁵Pwihsí bidxa'gasto' ra' ba xchi'dxyi Dxiohs cun nee guelrnabwa' xteenn Dxiohs cun xteenn guelnabahan nacuubi nin gue'du dxi!. ⁶Sidela la'h ra' ba gabia'garii ra' ba loh guelnabahan nin gohpa ra' ba galoh ayi ru gaca dxiaca nayaa ra' ba loh duhlda nee ayi ru nuu dxiaca za'ca loh xigaaba ra' ba laasii la'h gahca ra' ba riigaca'h ra' ba la'h Llii'n Dxiohs

loh cruhzi stuhbi nee zusi'xtuhyi
ra' ba la'h Ñi'h loh ra' bwiinn
ziahahn. ⁷Naa ra' ba ziga yuh nin
ree' ñihsadxiah chin riaaban loh
guidxyiyuh: sidela la'h loh yuh chi
gudi'hi guelnaza'ca la'h bwiinn nin
ruhnnee loh yuh chi dzi'n, nahpan
guelruhntaa'y i xteenn Dxiohs,
⁸per sidela ganaalla yaguihchi
ra' cun cwa'ndxaaba ra' guitahn
lohon, ayi xi gallu'yiti'hin; ziaaban
loh xquelguxchisi Dxiohs, nahpa
zica'dxihin.

Dxyi'dxyi nin ruzuhchihpa sto' nu'h

⁹Per nicala rachiñi' nu loh tu
bwihtsi ra' nin nadzii'hi nu, naann
nu ba guhca ntaa'y i tu cun naann
za nu ba gula'h tu loh duhlda,
¹⁰laasii Dxiohs naa nin ruhnn
guelguxchisi za'ca, nee ayi xclaa'dzi
Ñi'h dxia'lda nin ruhnn tu nee
guelruca'hsto' nin nahpa tu la'h
Ñi'h chin rahcanee tu la'h bwihtsi
ra' nu'h loh guelriachiisto' xteenn
Dxiohs, cun gallee ra' dzi'n za'ca
nin zeezah cayuhnn tu, ¹¹yannah
xclaa'dzi nu tuhbigah tu chezah
dzi'tsi tu loh siguhra dzi'tsi nin
nahpa tu loh xchi'dxyi Dxiohs tin
guica'ha tu garaa nin xclaa'dzi
Dxiohs guni'hi Ñi'h la'h tu. ¹²Ayi
xclaa'dzi nu gaca tu bwiinn raa'lla,
ni'chin gulgui'hnn ziga bwi'hnn ra'
bwiinn galoh; gohpa dzi'tsi ra' ba
dxyi'dxyi ra' nin gwachii duxa sto'
ra' ba, guleeza ra' ba tin guca'ha
ra' ba guelnaza'ca nin bia'han
dxyi'dxyi gudi'hi Dxiohs la'h ra' ba.
¹³Pwihsu chin bia'hann
dxyi'dxyi Dxiohs la'h guehtu
Abrahn, guñi' chihpa Ñi'h pur la'h

gahca Ñi'h, laasii ayi nin stuhbi nin
lasahca loh Ñi'h, ¹⁴ya rahbi Ñi'h:

Guchiin zuhnntaa'y i hn yiha
lu'h ziahahn nee zuni'hizahn
ziahahn ra' llahga lu'h.

¹⁵Ya Abrahn guleeza ba cun
paseensi ya zi'chi guca'ha ba nin
bia'hann nee dxyi'dxyi Dxiohs la'h
ba, ¹⁶laasii chin rñi' chihpa tuhbi
ndxi'hw, rñi' chihpa ban pur stuhbi
bwiinn nin lasahca ru loh ba; ya
chin ruze'ta ra' ba la'h bwiinn chi
pwihsu ayi ru xa guunn ba gucha'h
ba xchi'dxyi ba. ¹⁷Zi'chi gahca
za rclaa'dzi Dxiohs gacabwa' ra'
llahga guehtu Abrahn zizohba
pa'hcaa dxyi'dxyi nin guñi' Ñi'h
loh Abrahn galohpii'yi. Zizohba
pa'caa xchi'dxyi Ñi'h laasii guñi'
chihpa Ñi'h dxyi'dxyi pur lah
gahca Ñi'h chin bia'han dxyi'dxyi
Ñi'h cun guehtu Abrahn. ¹⁸Ni'chin
nnah, nuu chiohpa dxyi'dxyi nin
ayi nuu guidxa'h, laasii ayi nuu
guiñi' Dxiohs dxyi'dxyi xihn, nahpa
ruza'loh Ñi'h xchi'dxyi Ñi'h, nee
bani'hi za Ñi'h guelriachiisto'
la'h ra' nin gwabiiga-gallu'n loh
Ñi'h, loh ra' nin zeezahnee loh
siguhra dzi'tsi xteenn ñi'h nin
bani'hi Ñi'h la'h nu'h pur lah Ñi'h,
¹⁹ya nin naannloh nu'h chi naa
nin ruzuhdzi'tsi lasto' nu'h ziga
tuhbi du'h dxii'ba nin zohba llaa'n
gaandxuu nin rna'zu chihpa la'h
baarcu. Ni'chi ruzuhdzi'tsi la'n
lasto' nu'h tin gadzihh nu'h dihtsi
lahdxii roo' xteenn guido' nin nuu
llaan'dxibaa', ²⁰hasta guyuu'tii
Jesuhs pur la'h ra' nu'h, tin galohyi
baxaala Ñi'h neziuh nin radzihh
loh Dxiohs tin naa Ñi'h bixohza nin

lasahca par tu'pazi ziga guhca za bixohza nin laa Melquisedec.

**Jesucristu naa bixohza lasahca
ziga naa Melquisedec**

7 Galoh chin guhca Melquisedec rrehyi xteenn guihdxyi Salem, guhca za ba bixohza roo' xteenn Yu'bi Dxiohs, ya chin gubia'garii guehtu Abrahm loh guehrru nin gudxiinn ba garaa ra' rrehyi ra' nin gudxindxinee ba, Melquisedec biria'h ba bagachi'loh ba la'h Abrahm tin gunaaba ba loh Dxiohs gacanee ru Ni'h la'h Abrahm,² ya badi'hi Abrahm la'h Melquisedec tuhbi cwa'h loh ts'i'h nin bwi'hnn ba gahn loh guehrru. Ya zee loh dxyi'dxyi Melquisedec "Mweer rrehyi nin ruhnn za'ca guelguxchisi", nee neezaa naa ba rrehyi loh guihdxyi Salem ziga zeezah loh dxyi'dxyi lah ba naa rrehyi xteenn guelrbwiwdxysto!.³ Dxyiigah si biinloh ba loh ra' bwiinn; nin ayi chyu gaann chyu naa xtaada ba, chyu naa xnaan ba, cun chyu naa lasaa' ba, nee ayi za chyu gaann cuuca guulaa ba, nin ayi chyu gaann za cuuca guhchi ba. Guhca ba ziga naa Lili'n Dxiohs, tuhbi bixohza nin ba nuu nabahan para tu'pazi.

⁴Pwihsi gulguia'ha balaaaca chi'h guhca Melquisedec tuhbi bwiinn za'ca tuhbi bwiinn roo': la'h ba badi'hi guehtu xtatita roo' nu'h Abrahm tuhbigah cwa'h nin lasahca duxa loh tuhbigah ts'i'h nin bwi'hnn ba gahn chin guluhlla gudxihdxinee ba la'h rrehyi ra',⁵ ya lehyi xteenn Moisehs, rnabwa' rca'ha ra' bixohza nin naa ra' lasaa'

ra' guehtu Levih tuhbi cwa'h mweeyi loh ra' lasaa' ra' ba ziga nin badi'hi guehtu Abrahm la'h Melquisedec, nicala naa ra' ba llahga guehtu Abrahm,⁶ per la'h Melquisedec nicala ayi naa ba bwiinn lasaa' guehtu Levih, badi'hi Abrahm tuhbi cwa'h xixteenn ba la'h Melquisedec, ya chi'chi bwi'hntaa'yi Melquisedec yihca Abrahm, nicala la'h Abrahm naa nin bia'hannee Dxiohs dxyi'dxyi,⁷ nee ayi naa tuhbi bwiinn nin gaca guini'i guriincaa, laasii bwiinn nin lasahca ru naa nin ruhnntaa'yi yihca nin gulliaa'ru lasahca.⁸ Ya lahda nu'h nnah, nuu ra' bixohza nin rca'ha ra' tuhbi diezimu naa ra' ba ndxi'hw ra' nin rahchi; per ziga la'h Melquisedec, loh Xchihtsi Dxiohs ruze'ta la'h ba ziga zi tuhbi bwiinn nin nuu nabahan gahca.⁹ Ni'chin zahca gaze'ta nu'h guehtu Levih nin rca'ha tuhbi cwa'ha loh lasaa' ba, per la'h gahca ba gudxihlli ba tuhbi cwa'ha chin badi'hi guehtu Abrahm tuhbigah yihca ts'i'hgah cwa'h la'h Melquisedec,¹⁰ laasii nicala nagahdxi chyu llii'n guehtu Abrahm chuu chin bagachi'loh Melquisedec la'h ba, per bazuhchihpa sto' ba laasii ba bia'han dxyi'dxyinee Dxiohs la'h ba zudi'hi Ni'h llahga ba, ni'chin chin la'h ba gudxihlli tuhbi cwa'h naa ba ziga nin zeenee gahca ra' llahga ni'h.

¹¹La'h ra' bwiinn Israel ra' guca'ha ra' ba xlehyi Moisehs chin biinloh bixohza nin guhca ra' xpwiinn guehtu Levih nin naa ra' llii'n guehtu Arohn, per sidela ñahca ñuhnn ra' bixohza

chi ñibahan nayaa ra' bwiinn nin gwazahnee lehyi chi, pwihs i ayi ru ñichi'hn ñuu' stuhbi bixohza nin naa ziga guehtu Arohn, sino que tuhbi bixohza nin naa ziga Melquisedec,¹² laasii chin rdx'a'h tuhbi bixohza nee lehyi nahpa guidxa'h,¹³ ya ziga rñi' xchi'dxyi Dxiohs, Daada Jesucristu naa bwiinn guriincaa famihyi, ya famihyi ra' rii' nagahdxi gaca nin tuhbi ra' ba bixohza,¹⁴ laasii nayaa-nayaa naann nu'h naa Daada Jesucristu tuhbi bwiinn lasaa' guehtu Judah, ya Moisehs ayi baze'ta ba xpwiinn Judah chin baze'ta ba bixohza ra'.

¹⁵ Ya nayaa naa nin rñi' nu nnah, laasii la'stuhbi bixohza cuubi biinloh nin naa ziga gahca guhca Melquisedec,¹⁶ ya la'h ba ayi guhca ba bixohza pur tuhbi lehyi nin ñiñi' xa ñiinloh ba, sino que la'h ba guhca ba bixohza pur guelrnabwa' nin ba nuu nabahan ba par tu'pazi.¹⁷ Squii' baze'ta Dxiohs la'h Ñi'h:

Yi'h naa lu'h tuhbi bixohza
par tu'pazi, ziga guhca
tuhbi bwiinn nin biria'hlah
Melquisedec.

¹⁸ Pwihs i z'i'chi zi babihxi lehyi galohyi chi, laasii ayi guhca ñuhnn bwiinn ziga baluu'yi lehyi chi.
¹⁹ Pwihs i ayi xlehyi dxi'h Moisehs ñuhnn gahn ñibahan za'ca bwiinn, per xlawaalha lehyi chi nahpa nu'h tuhbi guelriachii sto' za'ca nu'h, nin ruhnn tin riobiiga nu'h loh Dxiohs.

²⁰ Per Dxiohs bazuh la'h Jesucristu bixohza cun dxyi'dxyi nin guñi'chihpa Ñi'h cun lah gahca Ñi'h,²¹ ya spaaldaa ra' bixohza ra' guhca ra' ba bixohza ayi cun

dxyi'dxyi nin rñi' chihpa per bixohza rii' guhca Ñi'h bixohza cun dxyi'dxyi nin rñi' chihpa, laasii loh Xchihtsi Dxiohs caa ziga guñi' Ñi'h:

La'h Dxiohs guñi' chihpa, nee
ayi gucha'h Ñi'h xchi'dxyi
Ñi'h, rahbi Ñi'h:
"Yi'h naa lu'h tuhbi bixohza roo'
par tu'pazi,
ziga gahca guhca Melquisedec."

²² Ni'chin la'h Jesucristu naa nin ruhnn zohba dzi'tsi dxyi'dxyi nin lasahca ru ra' rii',²³ ya snuhn ra' bixohza ra' guhca ziahan ra' ba, per ziga nahpa rahchi ra' ba ni'chin ayi nuu para ñazah ru ra' ñibahan ra' ba,²⁴ per ziga la'h Jesucristu ayi chuu gachi Ñi'h stuhbi, ni'chin nin ayi chuu chapitii xquel bixohza Ñi'h.
²⁵ Pwihs i ni'chi zan rahca ruta'h Ñi'h la'h ra' bwiinn loh duhlda par tu'pazi, ruta'h Ñi'h garaa ra' nin riabiiga loh Dxiohs pur la'h Ñi'h laasii ba nabahan Ñi'h par tu'pazi tin canaaba Ñi'h loh Dxiohs pur xpwiinn Ñi'h.

²⁶ Pwihs i Jesuhs naa bixohza roo' nin rchi'hn nu'h; la'h Ñi'h naa Ñi'h saantu nin ayi guhpa nin tuhbi duhlda, biria'caa Ñi'h loh ra' bwiinn duhlda ya guyahsa Ñi'h guiya' ru nee llaa'ndxibaa!²⁷ Ayi naa Ñi'h ziga snuhn ra' bixohza ra', nin rdxiainn ra' maan ra' nee nahpa ruti'dxi guhn ra' ba ma guillii-guillii, mwer galoh pur xtuhlda ra' ba chi'chi pur xtuhlda ra' bwiinn. Per la'h Jesuhs tuhbi si batidxiloh Ñi'h guelrza'cázii; chin gucah Ñi'h loh cruhzi, baxi'hi Ñi'h llarihn Ñi'h pur xtuhlda nu'h tin zi'chi gudxihlli Ñi'h xtuhlda ra' nu'h par tu'pazi.
²⁸ Xlehyi Moisehs rusaa'n gaca

tuhbi ndxi'hw bixohza nin rahchi,
per dxyi'dxyi nin guñi' chihpa
Dxiohs gulii Ñi'h la'hgahca Llii'n
Ñi'h nin naa bixohza roo' nin naya
nin banabahan za'ca par tu'pazi.

**Jesucristu naa nin rñi' loh
Dxiohs pur la'h nu'h**

8 Dxyi'dxyi nin lasahca ru
loh ra' dxyi'dxyi nin cañi'
nu'h naa squii': bixohza nin
naa xpixohza roo' nu'h la'h Ñi'h
guzohba xlaldu derehchu Dxiohs
llaan'dxibaa', ²nee naa Ñi'h bixohza
la'n yuu' nin naa saantu nadaa,
hasta bwi'hnncha'yi Dxiohs; ayi
la'n guido' dxi'h nin ruhnn cha'y'i
ra' bwiinn loh guidxyiyuh. ³Pwihs
ziga garaa ra' bixohza nin lasahca
ru bibwi'hi ra' ba tin batil'dxi guhn
ba guidxa'h cun snuhnru guhn ra'
loh Dxiohs nin nuu dxibaa'. Pwihs
ni'chin neezaa la'h Jesucristu
guhpaa Ñi'h ziga batil'dxiguhn
Ñi'h la'hgahca Ñi'h nez loh Dxiohs.
⁴Sidela la'h Ñi'h nuu gahca Ñi'h loh
guidxyiyuh rii', nin ayi ñahca Ñi'h
bixohza, lasii loh guidxyiyuh rii'
guyuu' gahca ra' bixohza ra' nin
badi'hi guhn ziga gunabwa' xlehyi
Moisehs, ⁵per dzi'n ra' nin bwi'hnn
ra' bixohza rii' guhca ziga tuhbi
bacaala xteenn garaatii' nin nuu
llaan'dxibaa', nee naann nu'h naa
ra'n bacaala laasii baluu'yi Dxiohs
la'h guehtu Moisehs chin baguuldaa
guunn ba xquido' Dxiohs, rahbi
Dxiohs loh ba:

Bwa'ha za'ca tin guunn lu'h
garaatii' zigapa'hcaa nin
balu'yi'hn yi'h loh dahan
Sinaí.

⁶Per la'h Xpixohza nu'h ruhnn
Ñi'h dzi'n nin lasahca ru, laasii
la'h Ñi'h naa Ñi'h nin zuu galaayi
loh xneziuh Dxiohs loh ra' bwiinn
guidxyiyuh, baluu'yi Ñi'h dxyi'dxyi
nin guñi' Dxiohs chin bwi'hnn
Ñi'h dxyi'dxyi cuubi loh ra' bwiinn
guidxyiyuh. Per dxyi'dxyi cuubi
ra' lasahca duxa run. ⁷Per sidela
ñahca ñusaguul'dzi sto' ra' bwiinn
lehyi nin badi'hi Dxiohs galohyi
la'h Moisehs ayi ñichi'hn ñuhnn
Dxiohs stuhbi lligaaba cuubi,
⁸per la'h Dxiohs bwa'ha Ñi'h
ayi bazo'badxiahga ra' bwiinn
guidxyiyuh xchi'dxyi Ñi'h, chi'chi
rahbi Ñi'h loh Xchihtsi Ñi'h:

Na'h rñi'n zadzihn ra' dxyiy
chin gu'nnahn stuhbi lligaaba,
dxia'han dxyi'dxyineen stuhbi
dxyi'dxyi la'h ra' bwiinn
Israel neezaa la'h ra' bwiinn
Judah tin guica'ha ra' ba
dxyi'dxyi cuubi,

⁹ayi ziga dxi'h lligaaba nin
bwi'hnnna'hn chin bia'han
dxyi'dxyineen la'h xtaada
guldoor' ra' tu la'n dxyiyh ra'
nin guna'zu'hn naa ra' ba
chin babwe'hehn la'h ra' ba
lahdxyi ra' bwiinn Egiptu.

Pwihs ayi bazo'badxiahga
ra' ba xchi'dxyi'hn nin
basia'hanee ra'n ba, ni'chin
gule'he sto'n la'h ra' ba,

¹⁰pwihs dxyi'dxyi ra' nin
ru'nnahn lligaaba xclaa'dzih
dxia'han dxyi'dxyi loh bwiinn
Israel chi'chiyi loh dxyiyh ra'
chi naa squii',
zu'nnahn para chu'tii xlehyi'hn
loh xquelrihn ra' ba, nee

zuca'h zahn xchi'dxyi'hn la'n
 lasto' ra' ba,
 chi'chi na'h gaca'hn Xchiohs
 ra' ba, ya la'h ra' ba gaca ra'
 xpwiinn ra'n.
¹¹ Ya nin tuhbi bwiinn ayi guluu'y
 ba lasaa' baa, nin bwihtsi ba,
 gahbi ba:
 "Guldiyu'nbwa' la'h Daada
 Dxiohs",
 laasii garaa ra' bwiinn ziu'nbwa'
 ra' ba na'h desde nin bi'tu'hn
 hasta nin guyu'xa,
¹² nee zalahsasto'n la'h ra' ba nee
 zusia'pitiin xtsi'n dxaaba ra'
 ba,
 nee ayi ru chuu dxyih
 gusaza'sto'n xtuhlda ra' ba.

¹³ Chin lu'h bia'han dxyi'dxyi
 Dxiohs dxyi'dxyi cuubi, pwihs
 dxyi'dxyi nin bia'han dxyi'dxyi Ñi'h
 galoh naan dxyi'dxyi yu'xa, ya ayi
 ru xi guilasahcan.

9 Pwihs, dxyi'dxyi nin bia'han
 galoh badi'hi lehyi chi xa
 guunn ra' ba chin raann ra' ba
 Dxiohs, neezaa xa gaca guido' loh
 guidxyiyuh tin guhcan chiohpa
 la'n yuu', ²ya nin naa mwer la'n
 hasta laa yuu' nadaa; la'n chi zuu
 gandayehru cun mweella cun
 pahn ra' nin guhcataa'yi pur lah
 Dxiohs. Nin raroopa la'n yuu' chi
 nuu dihtsi lahdxi roo' chi ³ya nin
 raroopa dihtsi vehlu (nin za'bi la'n
 tabernaculu chi) laa yuu' nadaa
 duxa xteenn Dxiohs. ⁴Ri'chi zuu
 tuhbi bacu'ga dxi'ba nin rahca
 guxa'hla la'n ñi'h, dxi'ba chi naan
 ganaalla ohro. Ri'chi za guyuu'

tuhbi dxihn nin nahcu ganaalla
 ohro gaduhbitii' tihxin nin nahpa
 ra' ba ziga tuhbi sehn nin ruluu'y'i
 ba badi'hi Dxiohs xchi'dxyi Ñi'h
 la'h ra' ba naa ra' ba xpwiinn
 Ñi'h, ya la'n dxihn ohro chi guyuu'
 tuhbi ploori dxi'ba ohro nin guyuu'
 tuhbi clahsa pahn nin biria'hlah
 manah; la'n gahca za dxihn chi
 guyuu' xpahra guehtu Arohn nin
 gule'he nacuubi bwii'n cun tahblu
 dxiah ra' nin baca'h Dxiohs gadzi'h
 dxyi'dxyi nin badi'hi Ñi'h la'h
 guehtu Moisehs, ⁵ya yihca dxihn
 chi zuu chiohpa figuhra xteenn
 xaanja Dxiohs; la'h ra' aanja chi
 naa ziga sehn ri'chi zuu Dxiohs,
 pwihs ri'chi nucha'ga yihca xihyi
 ra' aanja ra' chi ri'chi za ruza'hla
 bixohza llarihn guidxa'h xcweenta
 xtuhlda ra' bwiinn. Pwihs ziahan
 ru dxyi'dxyi zahca gaze'ta nu loh
 dee' per nnah hasta ri'chi gasia'han
 ra' nun.

⁶Ya chin guluhlla bazuhcha'yi
 ra' ba garaa dee', chi'chi riuu'tii ra'
 bixohza zi'chi zi la'n yuu' nadaa
 tin raann ba Dxiohs, ⁷per la'n
 stuhbi nin raroopa lahta xteenn
 la'n yuu' chi riuu'tii la'h dxi'h
 bixohza nin rnabwa' per tuhbi
 dxi'h dxyih loh tuhbi yihza; ya loh
 nin riuu'tii bixohza nin rnabwa'
 chi la'n chi nahpa rianee ba rihn
 xteenn guidxa'h tin ruti'dxi guhn
 ban ri'chi tin dxiaa xtuhlda ba nee
 dxiaa za xtuhlda bwiinn guihdxyi
 ra', ⁸per cun dee' ra' ruluu'y'i
 Spíritu Saantu Dxiohs la'h nu'h.
 Loh nin mwergaloh garolda la'n
 yuu' tabernaculu chi hasta raann ra'
 ba la'h Dxiohs rahca raann ra' ba
 Dxiohs loh gaduhbi nin nagahdxi

guillaalaga'h hasta naa yuu' nadaa duxa xteenn Dxiohs. ⁹Garaa ra' nin guhca galoh naa ziga tuhbi bacaala nin baluu'yi xa gacan nnah, laasii guelguhn ra' cun neezaa maan ra' nin badi'hi ra' ba loh Dxiohs ayi rusiaa za'can xquelrihn ra' bwiinn nin rudi'hi guhn maan ra' loh Dxiohs, laasii llarihn maan ra' basie'wzin loh xtuhlda ra' bwiinn. ¹⁰Dee' naa ganaalla zi nin rahw bwiinn, nin ree' ba, cun guelrohbañihsa o xilla stuhbi dzi'n nin ruhnn bwiinn tin riaa ganaalla tihxi zi ba hasta la'n dxyihyi nin gucha'h Dxiohs garaatii'.

¹¹Per la'Jesucristu bi', yannah la'h Ñi'h naa Ñi'h bixohza roo' xteenn ra' dxyi'dxyi cuubi nin lasahca ru nnah, Nacuubi naa la'n guido' hasta ruhnn Ñi'h dzi'n xteenn bixohza, ya naza'ca ru cun nayaa ru guido' cuubi chi nee ayi guhcacha'yin cun naa ra' bwiinn guidxyiyuh, nee ayi za naan guido' loh guidxyiyuh rii'. ¹²La'h Jesucristu guyuu'tii' la'n hasta naa pa'caa yuu' nadaa duxa xteenn Dxiohs, tin ayi guti'dxi guhn dxi'h Ñi'h llarihn ra' chihva cun guun sino que llarihn nabahan Ñi'h; ya la'n yuu' chi guyuu'tii' Ñi'h tuhbi si par tu'pazi, tin zi'chi bata'h Ñi'h la'h ra' nu'h loh duhlda par tu'pazi. ¹³Garaa ziga guñi' ra' bwiinn biaa xtuhlda ra' ba naa squii' cadxyih roo': llarihn ra' guun, cun llarihn ra' chihva, cun cobadeh xteenn guidxa'h nin bacal'dxi'h ra' ba la'n guido' nadaa chi nin baro'ba ra' ba yihca ra' bwiinn ra' nin nahpa duhlda. ¹⁴Per sidela basiaa dee ra' xtuhlda bwiinn nez tihxi zi ra' ba, ibalaaca chi'h lla llarih

Jesucristu ayi dxia'hán gusiaa xtuhlda bwiinn!, laasii nahpa Ñi'h guelnabahan par tu'pazi, la'h gahca Ñi'h badi'hi Ñi'h llarihn Ñi'h loh Dxiohs ziga tuhbi guhn nin ayi nin tuhbi duhlda, ya llarihn Ñi'h rusiaa loh xquelrihn nu'h pur dzi'n ra' nin ayi xi lasahca tin chuu nu'h loh Dxiohs nin nabahan par tu'pazi. ¹⁵Pwihsí ni'chin Jesucristu naa nin rusia'lida dxyi'dxyi naa Ñi'h nin zuu galaayi loh Dxiohs llaa'ndxibaa' neezaa loh ra' bwiinn guidxyiyuh pur xcweenta dxyi'dxyi cuubi, ya loh nin guhchi Jesucristu tin chapitii xtuhlda ra' bwiinn cun bwiinn za ra' nin bwi'hnn ziga caa loh lehyi Moisehs tin guica'há garaa nin ba gudihdxyi Dxiohs guelnabahan para tu'pazi, ziga bia'han dxyi'dxyi Ñi'h dez galohii'. ¹⁶Dxyi'dxyi cuubi rii' naa ziga chin xclaa'dzi tuhbi bwiinn guinabwa' ba xa guiga'zi xixteenn ba chin galda gachi ba, nahpa guca'h bwiinn chi loh tuhbi dxihtsi xa guiga'zin chi'chi guca'h lah ba, per chin nnahyi gachi bwiinn chi ayi xi guilasahca dxihtsi chi. ¹⁷Pwihsí ayi xi guilasahca dxihtsi chi sidela la'h bwiinn nin bwi'hnnan nabahan ba; sola lasahcan chin ba la'hba guhchi. ¹⁸Pwihsí ni'chin chin bia'han dxyi'dxyi Dxiohs cun la'h ra' bwiinn Israel galoh, nahpa guhchi tuhbi guidxa'h tin billi'hi rihn. ¹⁹Chin guluhlla guñi' Moisehs xcweenta dxyi'dxyi ra' ziga nin caa loh dxihtsi lehyi loh ra' bwiinn Israel, chi'chi guca'há ba llarihn ra' bicerru ra' cun llarihn chihva, cun ñihsa, cun dxyihchi xñaa cun tuhbi llii'dzi yahga nin laa hisopo; chi'chi

cun llii'dzi yahga chi baro'ba ba
rihn chi loh dxihtsi chi cun yihca
garaa ra' bwiinn ra' chi,²⁰chi'chi
rahbi ba:

Rihn rii' naa sehn xteenn
dxyi'dxyi nin bia'hан
dxyi'dxyi Ñi'h loh tu
zizo'bapa'hcaa guunn tu.

²¹Zi'chi gahca za baro'ba Moisehs
rihn chi la'n guido' cun yihca garaa
ra' nin xchi'hn ra' bixohza chin
raann ra' ba Dxiohs la'n guido' chi.
²²Lehyi xteenn Moisehs rnabwa'
nahpa cun rihn riaa xtuhlda ra'
bwiinn, ya ayi rahca nayaa ra' ba
loh duhlda sidela la'h rihn ayi
rili'hi.

Llarihn Jesucristu ruzia'tii xtuhlda bwiinn ra'

²³Ni'chin bichi'hn guhchi
guidxa'h ra' rii' nee billi'hi
llarihn ra' ma tin basiaa'han la'h
ra' nin naa ziga xpacaala ra' nin
nuu llaa'ndxibaa', per nin nuu
lla'a'ndxibaa' xchi'hn guilli'hi
llarihn tuhbi nin lasahca ru,
²⁴laasii la'h Jesucristu ayi guyuu'tii
Ñi'h la'n yuu' saantu nin ruhnn
cha'y i ra' bwiinn guidxiyu, nin
naa ziga xpacaala guido' pa'caa
xteenn Dxiohs sino que guyuu'tii
Ñi'h llaa'ndxibaa' tin cañi' Ñi'h
pur xcweenta ra' nu'h loh Dxiohs,
²⁵nee ayi za bichi'hn ñilli'hi llarihn
Ñi'h ziahán ziga nahpa ruhn ra'
xpioxhza roo' ra' bwiinn Israel chin
riuu'tiinee ra' ba llarihn guidxa'h
la'n yuu' nadaa duxa xteenn Dxiohs
yihza cun yihza.²⁶ Sidela nahpa
ñuhnn Ñi'h ziga ruhn ra' bixohza,
nahpa ñahchi Ñi'h ziahán dez chin
gurihxchih guidxyiyuh, per nnah

chin badzihn dxyih, baluu'yiloh
Jesucristu tuhbi dxi'h tin la'h gahca
za Ñi'h badi'hi Ñi'h llarihn Ñi'h loh
Dxiohs chin guhchi Ñi'h loh cruhzi,
tin zi'chi basia'pitii Ñi'h xtuhlda
ra' nu'h par tu'pazi,²⁷laasii garaa
ra' bwiinn nahpa gachi ra' ba tuhbi
dxi'h, ya chi'chiyi tiidxi ra' ba loh
xquelguxchisi Dxiohs.²⁸Pwihs
zi'chi za la'h Jesucristu tuhbi chi'h
zi baxi'hi Ñi'h llarihn Ñi'h loh
cruhzi tin basia'pitii Ñi'h xtuhlda
ra' ziahán duxa ra' bwiinn. Per
nahpa guibia'garii Ñi'h stuhbi ayi
tin gusia'pitii ru dxi'h Ñi'h duhlda
sino que tin guta'h Ñi'h la'h gallee
bwiinn nin cabweeza la'h Ñi'h.

10 Laasii xlehyi Moisehs naa
ziga zi tuhbi bacaala xteenn
ra' nin ze' nnah, per ayi gacan ziga
pa'caa dxyi'dxyi cuubi ra' chi; ni'chin
lehyi cun llarihn guidxa'h ra' nin
rili'hi gazohba yihza ayi gaca guunn
za'can la'h ra' bwiinn nin riabiiga
loh Dxiohs, laasii ayi nuu gusia'pitii
llarihn guidxa'h xtuhlda bwiinn.
²Pwihs sidela la'h lehyi ñahca ñuhnn
nayaa la'h ra' bwiinn loh duhlda,
pwihs ayi ru ñudi'hi ra' ba llarihn
ra' guidxa'h laasii chin guya'pitii
xtuhlda ra' ba nee loh xquelrihn
ra' ba ayi ñu'nawa' ru la'h duhlda,
³per xquelguhchi ra' guidxa'h cun
guelrudi'hi ra' ba llarihn ra' ma
gazohba yihza sola rallu'yin para
rusaza'n sto' ra' ba xcweenta xtuhlda
ra' ba,⁴laasii llarihn ra' guidxa'h
ayi nuu gusia'pitii xtuhlda bwiinn,
⁵ni'chin la'h Jesucristu chin bi' Ñi'h
loh guidxyiyuh rahbi Ñi'h loh Dxiohs:
Ayi xclaa'dzi lu'h llarihn ra'
guidxa'h nin rahchi ra' tin
gusiaa ra' xtuhlda ra' bwiinn.

⁶ Ayiza biuu' sto' lu'h guhn ra'
nin guca'dxih ra' guidxa'h
nin rahca ra' tin gusiaa ra'
xtuhlda ra' bwiinn.

⁷ Ya chi'chi ra'pihn:
"Rii' ze'l dahm tin gu'n nahm ziga
xclaa'dzi lu'h gaca, Daada
Dxiohs", (ziga nin caa loh
dxihtsi ra' pur nin saca'h).

⁸ Chin guyal'loh guñi' Jesucristu
dxyi'dxyi ra' rii': "Ayi xclaa'dzi
lu'h cun ayi za riuu'sto' lu'h
xquelguhchi guidxa'h neezaa guhn
nicala za xquelrca'dxih cun llarihn
guidxa'h nin runi'hi ra' bwiinn
pur xtuhlda ra' ba ziga caa loh
dxihtsi lehyi guunn ra' bwiinn",
⁹ ya chi'chi rahbi Ñi'h: "Na'h
ze'l dahm tin gu'n nahm ziga pa'caa
nin xclaa'dzi Yu'bili'h gu'n nahm,
Daada Dxiohs", chi'chi basia'pitii
Ñi'h nin guhca galoh tin pur llarihn
Ñi'h gulahchixchih Ñi'h dxyi'dxyi
cuubi nin basia'hannne Ñi'h la'h
nu'h nnah. ¹⁰ La'h Dxiohs basiaa
la'h nu'h laasii bwi'hnn Jesucristu
ziga guhca xigaaba Dxiohs guxi'hi
Ñi'h llarihn Ñi'h chin gucrah Ñi'h
loh cruhzi tuhbi chi'zi par tu'pazi.

¹¹ Garaa ra' bixohza ra' nin naa
bwiinn Israel, ruhn ra' ba dzi'n
guillii-guillii tin zeezah rudi'hi ra'
ba guidxa'h chi'hi zi cun llarihn
ra' ma, ziga caa loh lehyi, nicala
la'h guhn ra' chi ayi nuu gusia'pitii
duhlda, ¹² per la'h Jesucristu
tuhbi chi'hi zi baxi'hi Ñi'h llarihn
Ñi'h loh cruhzi tin basia'pitii Ñi'h
xtuhlda ra' bwiinn guidxyiuh par
tu'pazi, chi'chi guzohba Ñi'h xlahdu
derehchu Dxiohs llaa'ndxiba', ¹³ ya
ri'chi cabweeza Ñi'h chin gadzih
dxyihs gutsiiga Dxiohs gallee nin

rdxyi'chinee la'h Ñi'h nez ñaa'
Ñi'h. ¹⁴ Ni'chin tuhbi chi'hi zi gucah
Ñi'h loh cruhzi tin basiaa Ñi'h par
tu'pazi la'h ra' bwiinn nin riachiisto'
ra' ñi'h xchi'dxyi Ñi'h. ¹⁵ Zi'chi
gahca za rñi' Spíritu Saantu Dxiohs
loh nu'h; nnah Ñi'h:

¹⁶ Dxyi'dxyi nin dxia'hannne ra'n
ba la'n dxyihs ra' chi gaca
squii', —rahbi Dxiohs—,
zigu'tiin xchi'dxyi'hn la'n
lasto' ra' ba,
nee zusia'han zahn xchi'dxyi'hn
loh xquelrihn ra' ba.

¹⁷ Ya chi'chi rahbi Ñi'h:
Nin stuhbi ayi gusaza'sto'n
xtuhlda ra' ba nee cun
xquelnadxaaba ra' ba.

¹⁸ Ni'chin chin la'h xtuhlda
bwiinn ba guyahpitii, ayi ru rchi'hn
gudi'hi ra' ba guidxa'h tin chapitii
xtuhlda ra' ba.

Yannah nahpa chobiiga nu'h loh Dxiohs

¹⁹ Ni'chin nnah bwiitsi ra',
ayi guidxyihs tu laasii zahca
gachiduxi'tii ra' nu'h la'n yuu'
nadaa duxa xteenn Dxiohs pur
llarihn Jesucristu. ²⁰ Chozah
nu'h loh neziuh nacuubi, neziuh
xteenn guelnabahan nacuubi, nin
baxaala Ñi'h para la'h nu'h pur
llarihn gahca Ñi'h nin badi'hi
Ñi'h loh Dxiohs tin chu'tii nu'h
hasta rbweeza Xtaada Dxiohs Ñi'h.

²¹ Jesucristu naa bixohza roo' nin
dzi'baloh loh ra' xpwiinn Dxiohs,

²² pwihs iñi'chin nahpa chobiiga
nu'h loh Dxiohs cun gaduhbi
guelnayaas sto' xteenn nu'h, ayi
guidxyihs nu'h nee ayi za gatuhyi
loh nu'h. Cun guelriachii za'ca

sto' nu'h biaa la'n lasto' nu'h loh xigaaba dxaaba nu'h, ya tihxi ra' nu'h bidxi'bin loh ñihsa nayaa,²³ pwihs chozah dzi'tsi nu'h loh dxyi'dxyi nin gwachiisto' nu'h, ayi chyu gucha'h xigaaba nu'h laasii zuza'löh Dxiohs xchi'dxyi Ñi'h nin basia'hannet Ñi'h la'h nu'h,²⁴ nee gachidxi'hyi za nu'h xa guidxiacanee nu'h la'h ra' lasaa! nu'h ziga tuhbi ziga stuhbi ra' ba tin zi'chi gantsii'hi lasaa! nu'h cun guidi'hnn nu'h ganaalla dzi'n za'ca.²⁵ Nin ayi za chyu guunn ziga ruhnn ra' bwiinn ra' nin ayi ru ri' chin radxa'galasaa! nu'h, sino que nahpa gachigu'gui'w lasto' lasaa! nu'h laasii la'h dxyih nin guibia'garii Daada Jesucristu zeegadzih gahxu.

²⁶Laasii sidela la'h nu'h cheezah chuu xtuhlda nu'h nicala ba bihn dxiahga nu'h xchi'dxyi Jesucristu, ayi ru gaca chapitii xtuhlda nu'h,²⁷ chi'chi sihn gachidxunee nu'h guelnadxyi'bi xteenn xquelguxchisi Dxiohs, nee bwehla roo duxa nin guñihchiloh la'h ra' bwiinn ra' nin bidxyi'chinee la'h Dxiohs.²⁸ Chin guyuu' chyuulla tuhbi bwiinn nin ayi bazo'badxiahga ziga guhca xlehyi guehtu Moisehs, nee nicala nuu chiohpa o chohnna bwiinn nin naann dzi'tsi guiní' ra' ba ayi ruzo'badxiahga ba lehyi chi pwihs nahpa rahchi ba, ayi chyu ralahaasto' ñi'h la'h ba.²⁹ Pwihs i'balaaca xchi'l ru guelrusa'cazzi duxa nin saca ra' nin rusia'ha xtuhyi la'h Llili'n Dxiohs, nee cun ziga rbwe'hesto' ra' ba llarihn Ñi'h nee rihm chi naa nin bia'han dxyi'dxyi basiaa la'h ra' ba loh

duhlda, nee rñi'yah ra' ba la'h Spíritu Saantu xteenn Dxiohs, nee la'h Ñi'h naa Ñi'h nin nadzii'hi la'h ra' ba?³⁰ Laasii ba naann nu'h guñi' Dxiohs squii': "Na'h si gu'nnahn xquel guxchi'sihn; na'h zusadxillih la'h ra' ba." Nee neezaa guñi' Ñi'h squii': "La'h nin naa Daada zuhnn guelguxchisi la'h ra' xpwiinn Ñi'h."³¹ iNadxaaba duxa saca bwiinn nin dxiaaba la'n naa Dxiohs nin nabahan dzi'tsi!

³²Pwihsi gulgaza'sto' tu xa guhca tu galohyi; chin gue'du guca'ha tu xchi'dxyi Dxiohs xa bazuhchihpa sto' tu, batil'dxiloh tu guelrza'cazzi duxa laasii guca'ha tu xchi'dxyi Dxiohs.³³ Guyuu' ra' lasaa! tu nin basi'xtuhyi ra' ba, nee guyuu' za ra' nin basa'cazzi la'h tu nez delanta loh ra' bwiinn ziahan. Guyuu' za nin badxa'galoh tu loh guelrza'cazzi ni'chi za batil'dxiloh tu guelrza'cazzi.³⁴ La'h tu balahsa sto' tu la'h ra' bwiinn ra' nin guyuu' lahtsidxi'ba ya hasta riahxi tu basaa'n tu gule'hellu'hu ra' ba xixteenn tu laasii guhcabwa' tu llaa'ndxibaa' nuu guelnaza'ca par la'h tu nin lasahca ru, nee naan nin ayi ñichilohtii!³⁵ Ni'chin nnah ayi guñihchi tu xquelriachiisto' tu xchi'dxyi Jesucristu tin ni'chi guunn guica'ha tu guelnabahan nin ayi ñichilohtii!³⁶ Pwihsi la'h tu nahpa cweeza dzi'tsi tu tin chin la'h tu ba bwi'hnn nin xclaa'dzi Dxiohs, ya chi'chi zica'ha tu nin bia'han dxyi'dxyi Ñi'h guica'ha tu,³⁷ laasii xchi'dxyi Dxiohs nin bia'han rñi' squii':

Za lliaa'yil'hñ ria'dxyi para dxi' nin nahpa dxi', ayi gacata'h Ñi'h.

³⁸ Bwiinn nin nabahan naya
pur ziga riachiisto' ba
xchi'dxyi'hn zibahan ba;
per sidela la'h ga gusaa'n ba
chechiisto' ba xchi'dxyi'hn,
ayi chuu nasaa sto'n gwa'hahn
loh ba.

³⁹ Ya la'h nu'h ayi naa nu'h nin
rusaa'n guelriachiisto' para ñichiloh
nu'h loh xtuhlda nu'h sino que naa
nu'h nin zena'hla tin ta'h nu'h loh
xtuhlda nu'h laasii riachiisto' nu'h.

Guelriachiisto' xchi'dxyi Dxiohs

11 Pwihs i ziga gaapa lu'h
guelriachii sto' naa siguhra
zica'ha lu'h nin cabweeza lu'h, cun
naannloh za lu'h chuu tuhbi cohsa
nin nagahdxi dxiinloh. ²Biahxinee
Dxiohs la'h xtaada guldoor' ra' nu'h
laasii gwachiisto' ra' ba xchi'dxyi
Ñi'h.

³Laasii nin riachiisto' nu'h, naann
nu'h bwi'hnncha'y i Dxiohs dxibaa'
cun guidxyiyuh pur xchi'dxyi Ñi'h,
laasii nin rachidia'ha ra' nu'h nnah
guhcan loh nin ayi biinloh galohyi.
⁴Pur ziga gwachiisto' guehtu Abel

xchi'dxyi Dxiohs badi'hi guhn ba
tuhbi guhn nez loh Ñi'h nin naza'ca
ru loh guhn nin badi'hi bwihtsi ba
nin biria'hlah Caín, ya pur ni'chin
guñi' Dxiohs naa guehtu Abel
bwiinn za'ca ru. Nnah nicala la'h
guehtu Abel guhchi ba, zeezahtii'
za'bi xchi'dxyi ba ziga gwachiisto'
ba xchi'dxyi Dxiohs.

⁵Zi'chi gahca za la'h Enoc pur
ziga gwachiisto' ba la'h Dxiohs,
ni'chin nin zeenee Dxiohs la'h
ba llaa'ndxibaa', nabahan ba ayi
guhchi ba, pwihs i ayi ru badxeela
ra' ba la'h Enoc laasii Dxiohs

zeenee la'h ba llaa'ndxibaa', nee
loh Xchihtsi Dxiohs rñi' galoh nin
nagahdxi guzee ba llaa'ndxibaa',
guluu'nasaa ba sto' Dxiohs. ⁶Pwihs i
ayi nuu cu'nasaa lu'h sto' Dxiohs
sidela ayi riachiisto' lu'h xchi'dxyi
Ñi'h, laasii ziga chebiiga lu'h loh
Dxiohs nahpa chechiisto' lu'h nuu
Dxiohs nee zudi'hi Ñi'h cohsa za'ca
la'h ra' bwiinn ra' nin gadxi'i hyi la'h
Ñi'h.

⁷Nee pur gwachiisto' guehtu
Noeh dxyi'dxyi nin guñi' Dxiohs
loh ba, chin rahbi Ñi'h ziaaba
ñihsadxiah nin gue'du gwa'ha ra'
bwiinn, chi'chi bwi'hnn ba nin
rahbi Dxiohs loh ba nee bidxyihbi
za ba laasii naann ba ruza'loh
Dxiohs dxyi'dxyi nin rñi' Ñi'h,
ni'chin bwi'hnncha'y i ba tuhbi
barcu roo' tin ayi ñahchi ra' bwiinn
lasaa' ba. Laasii gwachiisto' ba
xchi'dxyi Dxiohs, ni'chi baluu'y i
ba balaaca nin ayi riachiisto' ra'
bwiinn guidxyiyuh dxyi'dxyi nin
baluu'y i ba, ni'chi guca'ha Noeh
guelnabahan za'ca nin gwachiisto'
ba xchi'dxyi Dxiohs.

⁸Pur guelriachiisto' xteenn
xchi'dxyi Dxiohs nin guyuu' sto'
guehtu Abrahm, chin gudihdxyi
Dxiohs la'h ba, bazo'badxiahga ba
xchi'dxyi Ñi'h biria'h ba lahdxyi ba
gwah ba nez hasta bia'handxyi'dxyi
Dxiohs gudi'hi Ñi'h guica'ha
ba. Pwihs i biria'h ba lahdxyi ba
guna'zu nehza ba zee ba nin ayi
gaann ba caa chi'h gadzihm ba.

⁹Pwihs i laasii guyuu' guelriachii
xteenn xchi'dxyi Dxiohs sto' guehtu
Abrahm, ni'chin guyuu' ba ziga
tuhbi bwiinnziiit loh yuh ra' nin
guxe'hla Dxiohs la'h ba, guyuu'

ra' ba la'n yuu' dxihdx ra', ziga gahca za bwi'hnn guehtu Isaac cun guehtu Jacobo, laasii nee loh ra' ba bia'handxyi'dxyi Dxiohs guca'ha ra' ba yuh ra' chi, ¹⁰laasii la'h guehtu Abrahm guleeza ba tuhbi guihdxyi nin zohba dzi'tsi, tuhbi guihdxyi nin guunncha'y i Dxiohs nee nin cwachixchih Ni'h.

¹¹Zi'chi za gohpa guehtu Sara guelriachiisto' xchi'dxyi Dxiohs tin nicala guyu'xa ba nee gudii'dxi ñuu' llii'n ba, per guca'ha ba guelrnabwa' tin guyuu' llii'n ba laasii gwachiisto' ba la'h Dxiohs nahpa baza'loh Ni'h xchi'dxyi Ni'h nin bia'hannet Ni'h la'h ba. ¹²Pwihs la'h guehtu Abrahm nicala ze'gadzih dxyih nin gachi ba, nahpa guyuu' ziahant duxa ra' llahga ba ziga zi dxih ra' nin nuu llaa'ndxibaa' nee cun ziga za yuhlli nin rii rwaa' ñihsado', nin ayi gaca gulaaba bwiinn.

¹³Garaa ra' bwiinn ra' chi guhchi ra' ba, nee ayi guca'ha ra' ba xiilla nin bia'hant Dxiohs dxyi'dxyi ñudi'hi Ni'h la'h ra' ba, ya nin gwachiisto' ra' ba xchi'dxyi Dxiohs bwa'ha ra' ban desde zihtu roo', ni'chin nin gwachiisto' ra' ba laasii naann ra' ba naa ra' ba ziga zi bwiinnziitu, ca'nzaa zi ra' ba loh guidxyiyuh. ¹⁴Pwihs nin rñi' ra' squii', cañi' ra' ba nayaanayaa cadxi'hyi ra' ba canehza gaca lahdxyi ra' ba. ¹⁵Sidela la'h ra' ba ñuhnn ra' ba lligaaba xteenn lahdxyi ra' ba nin biria'h ra' ba, ñahca ñibia'garii ra' ba ri'chi, ¹⁶per xclaa'dzi ra' ba tuhbi guihdxyi za'ca nez nuu Dxiohs llaa'ndxibaa', pwihs ni'chin la'h Dxiohs ayi ratuhyi loh Ni'h guiria'hlah Ni'h

Xchiohs ra' ba, laasii nahpa cha'y i Ni'h tuhbi guihdxyi za'ca nin chuu ra' ba llaa'ndxibaa'!

¹⁷Pwihs pur guelriachiisto' xteenn Dxiohs nin guyuu' sto' guehtu Abrahm, ni'chin chin badi'hi Ni'h tuhbi dzi'n nagahn la'h ba tin gwa'ha Ni'h xa guunn ba, gwanee ba la'h Isaac tuhbi lahta tin ñudi'hi ba la'h Isaac ziga tuhbi guhn loh Dxiohs. Pwihs ayi biaa ba ñudi'hi ba la'h tuhbi dxi'h llii'n ba chi guhn loh Dxiohs, nicala bia'hannet Dxiohs dxyi'dxyi la'h ba ¹⁸rahbi Ni'h:

Pur Isaac ziahan llahga lu'h chuu!

¹⁹Laasii la'h guehtu Abrahm naann dzi'tsi ba nahpa Dxiohs guelrnabwa' tin gucwa'hn Ni'h bwiinn loh guelguhchi, pwihs zi'chi zahca guiñi' nu'h ñahca ziga zi guhchi Isaac nee gubia'garii babahn bi tin baca'ha xtaada bi la'h bi stuhbi.

²⁰Pwihs zi'chi za la'h guehtu Isaac guyuu' guelriachiisto' xteenn xchi'dxyi Dxiohs sto' ba ni'chin bwi'hnnataa'y i ba yihca guehtu Jacobo cun guehtu Esaú, ya guñi'xgah ba xi ni'ca guunn tuhbigah ra' bi. ²¹Zi'chi za la'h guehtu Jacobo guyuu' za guelriachiisto' xteenn xchi'dxyi Dxiohs sto' ba chin la'h ba naa gachi bwi'hnnataa'y i ba yihca tuhbigah ra' llii'n guehtu Joseh, chi'chi guna'zu ba tuhbi yahga gaandxu tin guzuh chihpa ba guunn ba la'h Dxiohs. ²²Zi'chi za la'h guehtu Joseh guyuu' za guelriachiisto' xteenn Dxiohs sto' ba chin ba naa gachi ba guñi'xgah

ba zaria'h ra' bwiinn Israel loh guihdxyi Egiptu, guñi' za ba xa nahpa guca'tsi ra' ba la'h ba.

²³Neezaa xcuzahn ra' guehtu Moisehs guhpa guelriachiisto' xteenn xchi'dxyi Dxiohs, ni'chin chin guulaa guehtu Moisehs, loh chiohpa bwe'hw gulu'la'n ra' ba la'h Moisehs laasii bwa'ha ra' ba chuhla bado'yil'hn guhca bi nee ayi bazo'badxiahga ra' ba dxyi'dxyi nin guñi' rrehyi nahpa gachi ra' biñi'n ndxi'hw, ²⁴ya gohpa za guehtu Moisehs guelriachiisto' xteenn xchi'dxyi Dxiohs sto' ba ni'chin chin guhca ndxi'hw ba ayi gunnah ba ñiria'lah ba llii'n llii'ndxa'pa rrehyi Egiptu, ²⁵sino que bwi'hnn ba lligaaba batil'dxilohnee ba la'h ra' xpwiinn Dxiohs guelrza'cazii xlawaal'hä ñahxinee ba guelnasaa ra' xteenn duhlda paaldaa si dxyih. ²⁶Par la'h ba lasahca ru batil'dxiloh ba guelrza'cazii ziga nin batil'dxiloh Jesucristu xlawaal'hä ñica'ha ba guelnaza'ca xteenn Egiptu laasii cabweeza si ba guelnaza'ca nin gudi'hi Dxiohs la'h ba. ²⁷Pwihsí pur guelriachiisto' xteenn xchi'dxyi Dxiohs nin guyuu' sto' guehtu Moisehs, biria'h ba loh guihdxyi Egiptu nee ayi bidxyihbi ba xquelnadxyi'chi rrehyi, gwazahnee dzi'tsi ba ziga naa xigaaba ba ziga nin bwa'haloh ba la'h Dxiohs nin ayi chyu gwa'ha.

²⁸Ya pur guelriachiisto' xteenn xchi'dxyi Dxiohs nin guyuu' sto' Moisehs bwi'hnn ba lañih xteenn paascu, gunabwa' ba baro'ba ra' ba llarihn ra' lli'hyi tuhbigah rwaa' yuu' nin guyuu' ra' bwiinn Israel ra' tin chin gudii'dxi aanjla

xteenn guelguhchi ri'chi nin tuhbi llii'nga'n galoh bwiinn Israel ayi xi gunnee ba. ²⁹Ya pur guelriachiisto' xteenn xchi'dxyi Dxiohs gudii'dxi bwiinn Israel galaayi ñihsado' nin laa ñisado' xñiaa ziga zi loh yuh bihdzi; ya chin guclaa'dzi ra' bwiinn Egiptu ra' ñuhnn zi'chi za, la'laga'h gubi'hyi ñihsado' chi yihsa ra' ba ya gwaal'ñihsa ra' ba.

³⁰Ya pur guelriachiisto' xteenn xchi'dxyi Dxiohs gurih barda dxiah xteenn guihdxyi Jericoh laasii galoh biahyi ra' ba gadidxi lee' dxiah chi loh gahdzi dxyih, ³¹ya pur guelriachiisto' guehtu Rahab, tuhbi gunna'h dxaaba, ayi guhchi ba chin guhchi ra' bwiinn nin ayi bazo'badxiahga dxyi'dxyi laasii la'h ba bagachi'loh ba nee guluu'cha'yí ba la'h ra' bwiinn Israel nin zeegalda'tsi xa naa guihdxyi chi.

³²¿Xi ni'ca ru guiní'n? Ayi gaca xi guze'ta ruhn nee ria'dxi guze'ta'hñ guehtu Gedeohn, guehtu Barac, guehtu Sansohn, guehtu Jefteh, guehtu Davihd, guehtu Samuel, neezaa guehtu daada ra' nin guñi' xchi'dxyi Dxiohs. ³³Gallee ra' ba guyuu' guelriachiisto' xteenn xchi'dxyi Dxiohs la'n lasto' ra' ba, ni'chin bwi'hnn za'ca ra' ba guelguxchisi, guca'ha ra' ba xquelrahcanee Dxiohs nin bia'han dxyi'dxyi guca'ha ra' ba, nee basie'w za ra' ba rwaa' ra' bwe'dzi, ³⁴basiu'yi ra' ba bwehla duxa ra', gula'h ra' ba loh guelguhchi tin ayi ñahchi ra' ba cun spahda. Bwiinn ra' nin badxahga bazuhchihpa ra' ba la'h ra' ba guhca nadxipa duxa ra' ba, guhca ra' ba bwiinn duxa ra' loh guehrru ra', nee bwi'hnn

ra' ba gahn la'h ra' xsuldahdu ra'
bwiinn ra' nin bidxyi'chinee la'h
ra' ba. ³⁵Guyuu' ra' gunna'h ra' nin
gubia'garii babahn xquehtaguhla ra'
ñi'h loh guelguhchi, ya snuhn ra' ba
guhchi loh guelrza'cazi xlawaah'ha
ñila'h ra' ba loh guelguhchi tin zi'chi
guca'ha ra' ba stuhbi guelnabahan
nin naza'ca ru loh guelnabahan rii'.

³⁶Snuhn ra' ba batidxitlo
guelrza'cazii nee guñi'yah bwiinn
la'h ra' ba, nezaa cun cadehn
biyi'bi ra' ba cun bie'w ra' ba la'n
lahtsidxi'ba. ³⁷Ya snuhn ra' ba
guhchi cun dxiah o chin guhca ra' ba
chiohpa taa'ha cun sierru. Nuu za ra'
ba guhchi ra' ba cun spahda, snuhn
ra' ba gurihzaa nezii-nezi'chi nee nin
guhca lahdxi nin guhta ra' ba guhca
dxihdxi lli'hyi o dxihdxi chihva, nee
batidxitlo ra' ba loh guelrza'cazii
duxa. ³⁸La'h bwiinn rii' nin ayi
bichi'hn ra' ñi'h loh guidxyiyuh nee
gurihzaa ra' ba nezii-nezi'chi nez loh
yuh bihdzi ra' nee nez la'n dahan
ra', la'n cwehva ra' nee cun caacazi
nez la'n bataa'ha ra' gubahan ra'
ba. ³⁹Garaa ra' ba nicala biahxinee
Dxiohs la'h ra' ba pur guelriachiisto'
ra' ba xchi'dxyi Ñi'h ayi guca'ha ra'
ba nin bia'han dxyi'dxyi Ñi'h loh ra'
ba, ⁴⁰laasii bwi'hnn Dxiohs lligaaba
guunn Ñi'h tuhbi dzi'n za'ca loh ra'
ba. Bwi'hnn Dxiohs lligaaba guni'hi
Ñi'h guelnaza'ca chi la'h nu'h nee
tuhsu gachica'ha ra' nu'hnn cun la'h ra'
bwiinn ra' chi nin bia'han dxyi'dxyi
guni'hi Dxiohsan.

Nahpa gaza'sto' nu'h xa
gubahan Jesucristu

12 Ni'chin nin naa nu'h
ziga nin zuu galaayi ra'

garaa ra' bwiinn ra' nin baluu'yi
guelriachiisto' xteenn Dxiohs nin
guyuu' la'n lasto' ra' ba. Ni'chin
nahpa gasaa'n nu'h la'h garaa ra'
nin ruhnn llahn loh xneziuh nu'h,
neezaa ra' duhlda nin ruchi'bi la'h
ra' nu'h loh xquelnabahan ra' nu'h,
tin ayi saca nagahn nu'h chozah
nu'h loh neziuh nin zoozahnee nu'h
nez hasta choo nu'h. ²Ni'chin nnah
nahpa guidi'hnn nu'h lligaaba za'ca
xa bwi'hnn Jesucristu nin badi'hi
guelriachiisto' la'h ra' ba nee nin
nahpa baza'loh nin gwachiisto' ra'
ba, ya la'h Jesucristu batidxitlo
Ñi'h guelrza'cazii loh cruhzi,
nee ayi za batuhyi loh Ñi'h pur
guelguhchi nin guhchi Ñi'h, laasii
naann Ñi'h chin ba batidxitlo Ñi'h
gallee guelrza'cazii chi zica'ha Ñi'h
guelnabahan nasaa, nee guzohba
Ñi'h xlahdu derehchu Dxiohs nin
nuu llaa'ndxibaa' hasta canabwa'
Ñi'h.

³Gulgui'hnn lligaaba za'ca
la'h tu xa batidxitlo Jesucristu
guelrza'cazii loh ra' bwiinn duhlda,
pwihsi ni'chin ayi cwe'hesto' tu nee
ayi za guiria'h gahn tu, ⁴laasii la'h
tu nnahyi ayi xi llarihn tu guilli'hi
loh guelruca'hnee xteenn duhlda.
⁵ ⁵Ta bia'ldesto' tu dxyi'dxyi nin
bwii'yidxyi'dxyinee Dxiohs la'h tu
ziga llii'n Ñi'h? Laasii squii' rni' loh
Xchihtsi Dxiohs, rahbi Ñi'h:

Llii'nahn, ayi cwe'hesto' lu'h
xquelnah Daada Dxiohs,
nin ayi za guiria'h gahn lu'h
chin cheenee lu'h tuhbi
dxyi'dxah xteenn Ñi'h,

⁶ laasii zi'chi ruhnnee Daada la'h
garaa nin nadzii'hi ba nee
rudi'hi ba tuhbi guelnah la'h

ra' bwiinn nin raaca llii'n
Ñi'h.

⁷Sidela la'h tu guzuhchihpa lasto' tu loh guelrza'cazii, pwihs zaca'ha Dxiohs la'h tu ziga zi tuhbi llii'n Ñi'h, laasii Ɂchu guzahn ayi rudi'hi tuhbi guelnah la'h llii'n ba?
⁸Per sidela la'h Dxiohs ayi ruhnnañ Ñi'h la'h tu ziga ruhn Ñi'h la'h ra' gallee llii'n Ñi'h, ayi naa tu llii'n pa'h Ñi'h; sola naa tu llii'n duhlda.
⁹Ba naann tu chin guhca nu'h biñi'n loh guidxyiyuh rii', bani'hi xtaada ra' nu'h tuhbi guelnah la'h nu'h tin bazo'badxiahga ra' nu'h xchi'dxyi ba, tin rachidi'hnn nu'h ziga nin xclaa'dzi ba gaca. Pwihs Ɂxinaa chi'h ayi chyu guzo'badxiahga xchi'dxyi Xtaada nu'h nin nuu dxiba' tin zi'chi gapa nu'h guelnabahan? ¹⁰Xtaada ra' nu'h loh guidxyiyuh rii' bani'hi ra' ba tuhbi guelnah la'h nu'h gaduhbi nin guhca nu'h biñi'n tin bazo'badxiahga ra' nu'h xchi'dxyi ra' ba, per la'h Dxiohs runi'hi Ñi'h dxyi'dxah la'h nu'h tin gachidxiaapaa nu'h tuhbi guelnabahan nayaan, tin gaca nayaan za nu'h ziga naa Ñi'h nayaan.
¹¹Guchii nin tuhbi guelnah ayi chyu riuu'sto' nu'hn chin dxuugati'dxiloh ra' nu'hn rahca nayaanan, per garaa ra' nin rut'i'dxiloh guelnah ra' rca'ha ra' ba tuhbi guelnabahan naza'ca.

Zizahcazii nu'h sidela gasaa'n nu'h xchi'dxyi Dxiohs

¹²Ni'chin pwihs gulgazuhchihpa naa tu nin badxahga, nee gulgazuhchihpa za yihca lliibi tu nin badxahga, ¹³nee gulgadxi'hyi

neziuh xteenn xchi'dxyi Jesucristu tin zuu dzi'tsi ñaa' tu.

¹⁴Gulchi'hyi xa guibahannee za'ca tu la'h gallee ra' bwiinn, nee gulchezahnee tuhbi guelnabahan nayaan, laasii garaa ra' nin ayi guibahan nayaan ayi nuu gwa'ha ra' ba loh Daada Jesucristu. ¹⁵Gulguia'ha za'ca tin ayi chyu tuhbi tu guñihchi loh xquelrahcanee Dxiohs, nee tin ayi gaca chyu tuhbi tu ziga xtulbaa' cwa'n naltaa' ra' nin ruxi'n la'h bwiinn. ¹⁶Pwihsi nin tuhbi tu ayi nuu gahpa stuhbi gunna'h loh nehza galoh che'hla tu, nee nin ayi za gaca tu nin ayi riuu'ria'zi xchi'dxyi Dxiohs ziga guhca guehtu Esaú nin batoo' pur tuhbi si guelwahw xquelnaza'ca ba pur naa ba llii'nga'n galoh xtaada ba, ¹⁷nee la'h tu ba naann tu, chin guclaa'dzi guehtu Esaú ñuhnntaa'yí xpaah ba yihca ba, sola gudxihldxi dxyi'dxyi xpaah ba la'h ba nicala bi'n duxa ba per ayi ru bidxeela ba xa ñuhnn ba ñucha'h ba nin bwi'hnn ba.

¹⁸Laasii la'h tu ayi gwabiiga tu ziga la'h ra' bwiinn Israel ra' tiхи danh nin ayi ñahca ñidxi' nin cacadxih cun bwehla duxa, hasta nacahyi guzih, hasta cayahca biduhn duxa. ¹⁹Nin ayi za bihn dxiahga tu rsiaa'ha trompeta, nee cun rsiaa'ha xchi'dxyi Dxiohs. Bwiinn ra' nin bihndxiyahga ra' rsiaa'ha xchi'dxyi Dxiohs ayi gudxihpasto' ra' ban ni'chin nin gudxi'n chihpa ra' ba ayi ru guiñi' Ñi'h, ²⁰laasii ayi gudxihpasto' ra' ba dxyi'dxyi nin guñi' Ñi'h chin rahbi Ñi'h: "Chyuchi'h zi tuhbi maan nin guicah tiхxi danh rii',

gulchiin ma cun dxiah o cun tuhbi yahga tu'chii." ²¹Guelnadxyi'bi duxa naa nin bwa'ha ra' ba ri'chi, ni'chin la'hgahca guehtu Moisehs rahbi: "Neezahn cachihchihhn cayuhnn guelnadxyi'bi." ²²Laasii la'h tu gwabiiga loh dahan nin laa Siohn, hasta naa lahdxyi Dxiohs nin nuu nabahan dzi'tsi, nee guihdxyi Jerusalehn nin nuu llaa'ndxibaa' hasta nuu ziahan duxa ra' xaanjla Dxiohs nin badiaa'ha raann la'h Dxiohs. ²³Ri'chi rii' ra' nin naa ra' llili'n Dxiohs, garaa ra' nin caalah ra' ñi'h llaa'ndxibaa'. La'h tu gwabiiga loh Dxiohs nin naa Jwehsitxeenn garaa ra' nu'h, neezaa loh ra' spíritu ra' bwiinn za'ca nin ba bwi'hnn nayaas Dxiohs. ²⁴La'h za nu'h bioobiiga loh Daada Jesucristu nin rusia'lدا dxyi'dxyi nee nin zuu galaayi loh Dxiohs nee loh za bwiinn guidxyiyuh pur dxyi'dxyi cuubi nin bia'han dxyi'dxyi Dxiohs, neezaa pur llarihn Jesucristu nin badi'hi Ñi'h loh Dxiohs pur la'h ra' nu'h. Llarihn Jesucristu rnaaba dxiaa xtuhlda ra' bwiinn guidxyiyuh, ni'chin lasahca run loh llarihn guehtu Abel nin rnaaba gaca guelguxchisi xcweenta bwiinn nin gudxiinn la'h ba.

²⁵Pwihsí ni'chin nnah gulgahca nasiin tin ayi cwe'hecaa tu nin cañi' loh tu xchi'dxyi Ñi'h, pwihsí bwiinn ra' nin ayi bazo'badxiahga xchi'dxyi Dxiohs nin baluu'yi ra' bwiinn nin bi' loh guidxyiyuh ayi bila'h ra' ba, zi'chi za la'h nu'h **¿Xa** guidi'hn nu'h tin dxiahxinee Dxiohs la'h nu'h?

²⁶Rsiaa'ha xchi'dxyi Dxiohs bañi'bi

guidxyiyuh galoh, per nnah rñi' Ñi'h stuhbi:

Ayi guidxyiyuh si dxi'h
guñi'bi'hn pwihsí nnah
neezaa dxibaa!

²⁷Ya chin baze'ta Ñi'h stuhbi guñi'bi Ñi'h guidxyiyuh zahcabwa' nu'h zadzihh dxyih guiñi'bi gallee nin bwi'hnncha'yi Ñi'h nee ziñihchiloh ra'n tin dxia'han si ganaalla nin ayi nuu guiñi'bi, ²⁸per lahdxyi nu'h nin runi'hi Dxiohs la'h ra' nu'h ayi nuu guiñi'bin, ni'chin gadi'hi nu'h guelzuxchiilli loh Dxiohs pur dee' ra' tin zi'chi gaann nu'h la'h Dxiohs gaduhbi sto' nu'h, nee cun xquelnadxyi'bi nu'h tin dxiahxinee Ñi'h la'h nu'h, ²⁹laasii la'h Xchiohs nu'h naa ziga tuhbi bwehla duxa nin ruñihchilohtii'.

¿Xa guidi'hn nu'h tin dxiahxinee Dxiohs la'h nu'h?

13 Ayi gucwe'za tu gaantsii'hi lasaa' tu ziga tuhbi ziga stuhbi tu; gulcwihi ziga zi bwihtsi lasaa' tu. ²Ayi dxia'ldesto' tu gaca tu bwiinn za'ca cun bwiinn ra' nin gadzihh yihdzi tu, laasii pur ni'chi nuu ra' ba nin ayi gaann ra' ba badi'hi ra' ba yihdzi ra' ba guleezaa xaanjla Dxiohs.

³Gulgaza'sto' tu bwiinn ra' nin nuu lahtsidxi'ba ziga zi nee la'h tu ñie'wnnee tu la'h ra' ba; gulgui'hnn lligaaba pur bwiinn ra' nin guza'cazii pwihsí nee la'h tu ayi nuudxyi'dxyi saca tu zi'chi za.

⁴Nee gallee nu'h gachidi'hnn lasahca nu'h xquelruchinaa nu'h tin guibahan nayaas nu'h cun che'hlá nu'h laasii zuhnn Dxiohs guelguxchisi la'h ra' nin ruhnn

guelgubwihlli nee nin rza'bisto' ñi'h stuhbi gunna'h. ⁵Ayi guca'hsto' tu mweeyi, guldxiahxi cun nin nahpa si tu laasii squii' guñi' Dxiohs: "Ayi gusa'na'hn yi'h nee ayi za cwe'hesto'n yi'h." ⁶Ni'chin ayi chyu guidxyihbi guiní:

Daada nin nuu dxibaa' naa nin rahcanee na'h,
ayi guidxyihbihn xi chi'h zi nin guunnee bwiinn na'h.

⁷Gulgaza'sto' tu la'h garaa ra' nin baluu'yi xa guibahan za'ca tu, nin baluu'yi xchi'dxyi Dxiohs la'h tu; gulgui'hnn lligaaba xa guya'loh xquelnabahan ra' ba, nee gulchezahnee ziga guelriachiisto' xchi'dxyi Dxiohs nin guyuu' sto' ra' ba. ⁸Ayi chuu dxyih guidxa'h Jesucristu, ziga guhca Ñi'h nna'yi zi'chigahca naa Ñi'h nnadxyih nee zi'chigahca za gaca Ñi'h par tu'pazi. ⁹Ayi za gusaa'n tu gusiahchi stuhbi bwiinn lasto' tu cun guriincaa dxyi'dxyi nin ruluu'yi ba, nee nin ayi naa ziga xchi'dxyi Jesucristu. Mas cha'yi chozahnee nu'h loh guelrahcanee nin ruluu'yi xchi'dxyi Dxiohs xlawaalha chozahnee nu'h xigaaba guelrahaw si. Pwihs i ayi xi lasahcatii' ni'chi laasii bwiinn nin gwazahnee lligaaba chi ayi baria'caa za'ca ra' ba.

¹⁰Naa'han ziga ñachidxiaapa nu'h tuhbi bacu'ga llaa'ndxibaa', nee zahca gachida'w nu'h nin dzi'ba lohon, per nin tuhbi bixohza nin zezahnee xlehyi Moisehs ayi gaca gahw ra' ba nin dzi'ba loh bacu'ga chi, ¹¹laasii xpixohza roo' ra' bwiinn Israel bat'i'dxi guhn ra' ba llarihn ra' guidxa'h la'n yuu' nin nadaa duxa xteenn

Dxiohs tin dxie'wloh ra' xtuhlda ra' bwiinn ra' chi, per ya tihxí ra' maan ra' chi rca'dxih ra' ban rwaal guihdxyi chi. ¹²Zi'chi za la'h Jesucristu bat'i'dxiloh Ñi'h guelrza'cazzi loh guelguhchi rwaal guihdxyi tin basiaa Ñi'h la'h ra' bwiinn loh duhlda cun llarihn Ñi'h. ¹³Ni'chin nnah gulchoo'ho choo nu'h loh Jesucristu rwaal guihdxyi tin gati'dxiloh nu'h la'h gahca guelrza'cazzi cun guelxtuhyi laasii guchii naa nu'h xpwiinn Ñi'h, ¹⁴pwihs i loh guidxyiyuh rii' ayi chyu nahpa tuhbi guihdxyi nin ba naa par tu'pazi, ni'chin dxuudxi'hyi nu'h tuhbi guihdxyi nin gue'du dx!'. ¹⁵Pwihs i ni'chin nahpa gadi'hi nu'h guelzuxchiilli loh Dxiohs pur Jesucristu pwihs i guelzuxchiilli rii' naa ziga tuhbi guhn nin gadi'hi nu'h loh Dxiohs, pwihs i gadi'hi nu'h guelzuxchiilli loh Ñi'h cun rwaal nu'h! ¹⁶Neezaa ayi dxia'ldesto' tu guunn tu bwen gacanee tu lassaa' tu ziga tuhbi guelnaza'ca nin cwachi tu guhn loh Ñi'h tin dxiahxinee Ñi'h la'h tu.

¹⁷Gulgazo'badxiahga xchi'dxyi ra' bwiinn nin rnabwa' la'h tu, laasii nahpa guti'dxi cweenta ra' ba loh Dxiohs pur xtsi'n tu, nee gulgui'hnn dxiahxi ra' ba loh xtsi'n ra' ba tin sidela gaca nalaasa sto' ra' ba ayi naan tuhbi xiilla guelnaza'ca para la'h tu.

¹⁸Gulguinaaba loh Dxiohs pur la'h nu, laasii naann dzi'tsi nu nayaas naa loh xquelrihn nu nee la'h nu xclaa'dzi gazo'badxiahga nu gachidi'hnn nu dzi'n za'ca loh garaatii' ra!. ¹⁹Rna'bazahn loh tu, cwidxyi chihpa tu loh Dxiohs

pur na'h tin gacanee Dxiohs na'h
guibia'gariin dxe'lida guia'han cuun
tu.

**Tuhbi guelruhnntaa'yi cun tuhbi
guelrgahpaDxiohsa nin ria'loh**

20 La'h Dxiohs nin naa
guelrbwihdxyii sto', nin bacwa'hn
la'h Jesucristu loh guelguhchi,
Jesucristu naa xpallwaa'n
ra' lli'hyi pur llarihn Ni'h nin
bwi'hnn guzohba dxyi'dxyi
cuubi nin ba naa par tu'pazi.
21 Dxiohs guunn gaca tu bwiinn
za'ca, bwiinn saantu loh xichi'hzi
nin guiclaa'dzi Ni'h guunn
tu, nee guunnee Ni'h la'h nu'h
ziga chi'h zi xclaa'dzi Ni'h pur
Jesucristu. iGulgui'hnn lasahca

lah Jesucristu par tu'pazi! Zi'chi
gaca, pwihsi.

22 Bwiitsi ra'n, rna'ba'hn loh tu ayi
guidxyi'chinee tu na'h pur chiohpa-
choon dxyi'dxyi nah nin baca'hn
loh dxihtsi rii' par la'h tu. **23** Pwihsi
gulgacabwa' nnah, la'lasaa' nu'h
Timoteu bare'h lahtsi dxi'ba;
sidela la'h Timoteu gadzihngah
ba rii', pwihsi dxe'l dane'hn ba
chin dxe'l daguia'han cuun tu.

24 GulgahpaDxiohs la'h ra' gallee
ra' nin ruluu'yi la'h tu nee gallee
ra' za bwiinn nin naa xpwiinn
Dxiohs. Ruxe'hla ra' bwiinn Italia
tuhbi guelrgahpaDxiohs para la'h
tu. **25** Dxiohs gacanee la'h tu nee
guunntaa'yi Ni'h yihca tu. Pwihsi
zi'chi nahpa gaca.